

吳橋王氏族譜

明萬曆五年王叔果修原本

卷四上	文紀	世傳	內傳	誌銘
卷三	見紀	誥勅	諭勅	諭祭文
卷五冊				



東嘉英橋王氏族譜

恩紀

敘曰

錫命至榮也對揚考成世以彰

國典徵家慶焉述恩紀

詔勅

吏部稽勲清吏司署員外郎事主事王激父母

勅命

奉

天承運

皇帝勅曰朕惟子樂有賢父父樂有肖子相值恒難我國

其心勵顯揚也爾王鉦乃吏部稽勲清吏司署員外郎

友克敦鄉評攸重向義近道不求聞達于時乃經術

氏為國偉才爾身雖未顯而志則伸名則昭優游

子之風載錫綸命增耀里閭天之報善不爽若此

吏部稽勲清吏司署負外郎事主事尚克欽承永綏壽祉

勅曰古者令妻壽母形諸歌頌可考也故賢于其夫貴以其子推錫之典寔昭勸焉爾張氏乃吏部稽勲清吏司署負外郎事主事王激之母孝敬夙全儉勤並懋相夫成子遂允厥宗眷茲元臣實爾季弟故爾之淑行昭聞朕用嘉焉茲特封為太安人茂膺寵光並臻晚福

勅命

嘉靖九年十二月二十日

之寶

吏部稽勲清吏司署負外郎事主事王激并妻

勅命

奉

天承運

皇帝勅曰六官之屬吏曹首之地要而責重焉匪得賢俊不以輕畀寔妙選也爾吏部稽勲清吏司署負外郎事主事王激學貫群經功收甲第肇臨鉅邑蔚有循吏之稱朕因採諸論薦簡擢銓曹乃能懋服官箴廉慎昭著

而其出典文衡掄材允當一時之人望歸焉歷年滋久最考是書可無寵
恩以為有位者勸茲特進爾階承德郎錫之勅命爾其益勵乃心修乃業
永終休聞以副朕任賢圖治之懷欽哉

初任江西吉安府吉水縣知縣

二任吏部考功清吏司主事

三任本部文選清吏司主事

四任今職

勅曰士夫名行恒資于內助之良故朝廷推恩羣臣必及其配焉宜也爾吏
部稽勲清吏司署負外郎事主事王激妻邵氏出自高門歸于望闕壺儀
既著婦德允脩然能以理相夫安厥誼命俾無內顧之懷斯其賢尤可嘉
哉茲特封為安人服此褒榮益敦儆戒

勅命

嘉靖九年十二月二十日

之寶

兵部武庫清吏司郎中王激并妻宜人潘氏

誥命

奉

天承運

皇帝制曰惟今兵部乃古夏官司馬之職列屬有四而厥任並重必得其人
乃克稱焉爾兵部武庫清吏司郎中王澈蔚以明經之彥歷擢今官乃能
持廉秉公懋修職業閱年滋久令譽日聞茲以大慶霽恩特授爾階奉
大夫錫之誥命爾其益勗乃心慎厥守嗣膺顯陟副我命辭欽哉

初任禮部司務

二任兵部車駕清吏司員外郎

三任本部武庫清吏司署郎中

四任今職

制曰國家褒錫群臣爰及厥配所以重齊體之義也爾兵部武庫清吏司郎
中王澈妻潘氏恪脩婦道克相厥夫夫既顯榮爾宜並貴茲特封為宜人
茂膺寵光益敦儆戒

制
誥

嘉靖十二年九月初五日

之寶

4 通政使司提督騰黃右通政王激父母

誥命

奉

天承運

皇帝制曰賢俊之興罔不由于父訓故國家緣子貴父匪徒顯之實重酬之爾封承德郎吏部稽勲清吏司署負外郎事主事王鉦乃通政使司提督騰黃右通政激兵部武庫清吏司郎中澈之父晦跡丘園罔干仕進謙恭孝友名孚鄉評經術貽謀慶鍾二子兩受推封增華命服斯爾之積累既深躬食其報宜哉茲特加封中憲大夫通政使司右通政尚懋祗承永綏祿養

制曰教子惟父成之惟母褒榮之命均宜逮焉爾封太安人張氏乃通政使司提督騰黃右通政王激兵部武庫清吏司郎中王澈之母毓粹相門媿休高士孝慈勤儉化行厥家克佐義方篤成二子以顯名于世雖褒章已

被而階品未隆茲特加封太恭人既壽而昌並臻遐祉

制 誥

嘉靖十三年二月十三日

之 寶

5
通政使司提督騰黃右通政王激并妻恭人邵氏

誥命

奉

天承運

皇帝制曰朕以元嗣誕祥霈澤宇內凡爾百辟咸被寵褒所以廣恩渥均休慶也爾通政使司提督騰黃右通政王激器資端慎學識精純名起甲科政成劇邑往者採諸論薦拔置銓曹勞績既彰再遷今任乃能廉慎弗渝進脩益懋一時士望翕然以歸朕甚嘉焉茲特授爾階中憲大夫錫之誥命爾其益展才猷以收明效國家優異之寵寧爾靳哉

初任江西吉安府吉水縣知縣

二任吏部考功清吏司主事

三任本部文選清吏司主事

四任本部稽勲清吏司署員外郎

五任本部考功清吏司郎中

六任南京通政使司右通政

七任今職

制曰人臣奉身額力以效勞國家蓋亦有內助焉故推恩之命必均及之爾
通政使司提督騰黃右通政王激妻封安人邵氏服勤履順相夫于成載
被顯封允昭壺範茲特封恭人茂服寵榮益敦儆戒

制 誥

嘉靖十三年二月十三日

之 寶

6 直隸大名府推官王德父母

勅命

奉

天承運

皇帝勅曰

7 直隸大名府推官王德并妻孺人邵氏

勅命

奉

天承運

溫州府 卷之二

皇帝勅曰呂刑稱敬忌惟訖古人制刑中于民其道始于在躬也今推官實有明刑之任必得其人躬履精白自我率乂則法無不訖而民無不中矣大名王畿之輔郡也所以慎刑而擇其人者尤不可不謹爾直隸大名府推官王德本以賢科授職而爾材識昭明志操堅定用能力持畫一之法身衛冤抑之民可謂精白之效已茲以兩歷名郡首最銓司乃進爾階文林郎錫之勅命朕聞刑法者先王所以佐德輔義非專之也是以唐虞克允成康丕式君臣相贊期于無刑朕甚樂與郡國親民之士同之特詔察舉將登于朝爾既知德義之指翕然升聞矣其益思所以贊朕于先王者欽哉

初任山東東昌府推官

二任今職

勅曰朕聞自古君子檢身事君慎職勵行其道固美矣而佐之隱微成之家庭則亦必有內德之助焉褒嘉之榮所以敘及閨閫者固以此也爾直隸大名府推官王德妻邵氏歸自茂族相茲吉人官有令名家多淑範可以觀其有助已茲封爾為孺人翟弗之華以彰賢懿

嘉靖二十七年七月十四日

之寶

8. 原任廣東按察司僉事贈太僕寺少卿王德

誥命

奉

天承運

皇帝制曰事君致身臣之職也乃若致政之臣則無官守而能捍患捐軀者朕甚憫焉褒善勸忠之典可不隆哉爾廣東按察司僉事王德才資果毅志操廉明爰自登名廷對佐郡有聲比陟諫垣值胡虜入擾畿甸爾時抗疏忠讜屢陳遂命募兵齊魯簡閱惟精既而握憲東粵肅法飭戎所居可紀乃以鯁直忤時而歸蠢茲島夷戕爾邑里倡率義旅入援危城禦寇勢孤竟遭竒禍朕用嘉悼特贈爾為太僕寺少卿兼錫祠廕嗚呼死天下之至難而成仁取義聖賢所重惟爾圖難效死雖未遂其壯猷而勁節英風允可傳之信史歆予旌寵慰爾忠魂

制 誥

嘉靖三十七年七月十四日

之 寶

9 贈太僕寺寺丞王沛

勅命

奉

天承運

皇帝勅曰士無民社之寄而有死事之勤其志壯矣國家愍其死而褒之以
 勸忠也爾益府良醫王沛出自宦族卓有義聞云當束髮之年即抱請纓
 之志值島夷倡亂民罔寧居其在嘉郡受禍尤烈爾乃鼓衆僇力保障一
 方躬率義兵屢挫劇敵詎意寇掩我之不備力遂屈於莫支兵刃交集膏
 塗草莽志雖未酬而忠則已盡視彼臨難為前卻者遠矣朕用嘉悼特贈
 爾為太僕寺寺丞加之祿廕嗚呼能以衛社稷之心效死封疆之力在分
 閭授鉞者猶難也謂一介之士能之乎國有彛章寧獨爾斬抑使士伍奮
 於戎行尚歆殊渥永慰忠魂

勅命

嘉靖三十八年三月二十二日

之寶

10 兵部職方清吏司主事王叔果父母

誥命

奉

天承運

皇帝制曰人臣宣力盡職所以報主亦所以顯親也其或子之位無所加於親則追進其親之階而慰恤之夫亦廣大孝於不匱之意爾爾原任福建布政使司左叅議王澈乃兵部職方清吏司主事王叔果之父茂以宿學暢於英猷歷官部曹以及藩服功望滋起既引身肥遯行誼卓然表式鄉邦未竟志業留衍後嗣念爾佑啓身沒而澤延矣茲特贈為朝議大夫雖位秩仍故而階敘增華峻登四品之崇靡忝五鼎之享英靈不昧服此隆名

制曰夫母之於子其鞠育顧復之恩有獨至者蓼莪之感古今之所同也國

家特普恩命通極幽明所以體臣子之孝思義至渥也爾封宜人潘氏乃兵部職方清吏司主事王叔果之母恭儉不渝柔嘉維則用相君子篤生良嗣終惠而嚴慈而知教顧梧棬之澤徒存而風木之悲彌切宜申湛綽用報劬勞加贈爾為太恭人祿養雖違而善慶為不沒矣

制曰教育之德恩等所生故子之事繼母猶母者非作而致其情也國家方求忠於孝馳榮之典可獨靳乎爾張氏乃兵部職方清吏司主事王叔果之繼母儆戒無違端嚴有則勗率厥子恪居官次亦可謂慈訓之光已茲封爾為太恭人於戲壽而且寧恩暉特被不亦大慰人子欲報之志哉益介遐齡祗膺寵敘

制 誥

嘉靖三十八年五月十二日

之 寶

兵部職方清吏司主事王叔果并妻安人林氏

勅命

奉

天承運

皇帝勅曰職方氏掌圖辨物以周知其利害而制軍詰禁安夏攘夷於司馬之屬為特重選授之艱著自古昔爾兵部職方清吏司主事王叔果學紹家聞登名廷對以篤茂之才列於是職而凡夷情之向背士馬之登耗山川沮澤之形險阨遠近之利事關軍國者能悉心講求以佐其長邇受命校文復收得人之慶文武並資展也邦括朕深有賴焉茲以考績授爾階為承德郎錫之勅命夫易之重門擊柝取諸豫詩之綢繆桑土迨天之未陰雨今疆郵時聳戍餉歲勤則所以疆本折衝翊襄廟算當無日不討軍實而申儆之爾尚協衷一力熟運沉圖以永遏亂畧則予汝嘉

勅曰凡人臣在位效忠慎之節固其自樹亦必內有貞淑之助焉故寵命錄及其配義之不可以已也爾林氏乃兵部職方清吏司主事王叔果之妻慈和靜正懋著閭儀能贊其夫篤學成名服官勵職則爾勤瘁之懷清約之志蓋亦有資焉矣爰頒從貴之恩用申齊體之義茲特封為安人尚敦儆戒茂迓寵光

嘉靖三十八年五月十二日

之寶

山東道監察御史王諍父母

勅命

奉

天承運

皇帝勅曰人臣有位不溢才仕不滿德而有羨之床貽於後人用能著稱中外光我紀綱之司此褒卹之不可或後者也爾原任松江府儒學教授王鍊乃山東道監察御史諍之父賦性直朴守己端嚴篤學潛心偶誦場屋傳經授業蔚有文名官不忝於師儒教實徵於訓子養雖未逮志則已伸茲特贈爾為文林郎山東道監察御史爰示國恩用昭世德

勅曰母氏之教育其子與父一也惟同享遐齡而親見其顯立則非作善種德培植有素不易致也匪均追錫曷以勸孝爾邵氏乃山東道監察御史王諍之母淑德性成懿質天賦相夫以正名重鄉閭愛子知勞賢聞臺省茲慈儀已邈卹典宜申特贈爾為孺人祇承茂渥永賁幽埏

勅命

嘉靖四十四年十一月二十七日

之寶

13
山東道監察御史王諍并妻孺人藍氏

勅命

奉

天承運

皇帝勅曰御史秉執憲度貞肅百僚為朝廷耳目之臣凡事之鉅細官之大
小咸得察舉而糾正之秩任華重自非端方直諒之士不與茲選爾山東
道監察御史王諍擢自大廷試於名邑賢聲茂著簡列辟臺爾能丕振風
裁足稱任使河東按治積年之姦蠹祛除滇省激揚邊境之豪強斂戢最
績來聞朕心嘉悅茲特進爾階文林郎錫之勅命夫律已嚴則措施能服
乎衆秉心虛則議論能協於公此固朝廷所望於士大夫者也尚懋爾猷
用禪國是欽哉

初任福建興化府莆田縣知縣

二任直隸應天府溧陽縣知縣

三任山東道試監察御史

四任今職

勅曰國家敷錫之典渙自大廷而佩服之榮及於中閭所以重齊體之倫錄相成之效也爾山東道監察御史王諍妻藍氏鍾祥望閥儷美名家夙端孝敬之儀丕著柔嘉之則克相夫子祇敘官常爾之賢徵已茲特封為孺人尚思象服之華益勵雞鳴之戒

勅命

嘉靖四十四年十一月二十七日

之寶

兵部車駕清吏司主事王叔杲并妻安人吳氏陳氏

勅命

奉

天承運

皇帝勅曰國家慎簡賢雋布列近寮惟司馬上卿職專邦政而駕部列屬典

在乘輿其任為重而選甚慎也爾兵部車駕清吏司主事王叔杲乃原任福建布政使司左叅議澈之子學紹一經名登奕世兩宰治于畿邑聿起頌聲數登薦於監司遂厯徵命爰詢衆論擢真司與綜理惟勤事罔弗舉防閑克慎吏不敢欺遠績若翁庫部之遺近接伯氏選司之跡以文儒而周還戎署效國用而茂振家聲朕甚嘉之茲值覃恩特授爾階承德郎錫之勅命於戲是父是兄世方有羨於善繼惟忠惟孝爾尚無忝於令名尚懋勲庸以資安攘庶其共禪予于治欽哉

初任直隸常州府靖江縣知縣

二任直隸蘇州府常熟縣知縣

三任今職

勅曰婦之於夫共隱約於鷄鳴盟櫛之時而不共休顯於象服委蛇之日豈非人恒之所甚惻者哉恩不並及非所謂稱也爾兵部車駕清吏司主事王叔杲妻吳氏作嬪儒門夙主饋祀勸脩學業期共顯融爾夫方薦于鄉書而身遂歸于泉室追懷往懿宜錫愍褒茲特贈為安人不昧者靈有歆斯渥

勅曰易重家人禮推宗婦古者士失令妻而擇賢繼之所以承先祀謹內治也國家覃恩廷窀婦從夫爵先後均焉爾兵部車駕清吏司主事王叔杲繼妻陳氏名閔淑媛儒流良配相其君子克致登庸效職宣勞罔有私顧足占爾之內襄矣茲特封為安人祇服齊體之榮尚敦交儆之益

勅命

隆慶元年三月初十日

之寶

大理寺左寺丞王諍父母

誥命

奉

天承運

皇帝制曰國家體羣臣而錫榮命必逮於其親蓋厚倫重本以教孝也矧奉法持平躋在九列者哉爾贈文林郎山東道監察御史王鍊乃大理寺左寺丞諍之父學有淵源行崇根本儲泮宮而應廷選任東土而歷南邦身教是敦迪成令子往在西臺既以報政馳恩矣今茲恩賚可令貴身而遺

親乎特贈爾為奉政大夫大理寺左寺丞欽服寵名增貢泉室

制曰人子之才雖由父嚴而亦資於母德故褒典均焉此令典也爾贈孺人邵氏乃大理寺左寺丞王諍之母慈惠成性勤儉起家躬順正以相夫明愛勞而教子階其隱約弗待顯融茲特贈爾為宜人錫賚九原尚其歆服

制 誥

隆慶元年六月二十五日

之 寶

大理寺左寺丞王諍并妻宜人藍氏

誥命

奉

天承運

皇帝制曰朕惟廷尉天下之平蓋先王明慎用刑慮有縱入重輕之弊而失其平者故選擇官僚必得長者充之庶幾欽卹之意常行于法之外至重典也爾大理寺左寺丞王諍性行醇良操持嚴固簡自民牧入列內臺扶正抑邪多可行之論獻可替否見勿欺之忠公望攸歸晉陟今秩乃能聽

讞明允奉法無私折獄哀矜導民遠罪書美惟良爾殆無愧也已茲特授
爾階奉政大夫錫之誥命於戲明刑弼教念古訓之具存謹始保終庶官
箴之不負尚加廉慎以俟登崇欽哉

初任福建興化府莆田縣知縣

二任直隸應天府溧陽縣知縣

三任山東道試監察御史

四任本道監察御史

五任大理寺右寺丞

六任今職

制曰詩詠宜家禮謹從爵故賢士大夫之配齊體相成而國恩宜並逮也爾
大理寺左寺丞王諍妻封孺人藍氏出自右族嬪于名門敬以持身克守
圖箴之訓惠能容下茂揚閭閻之儀婦道既備褒章宜錫用旌內助式耀
中閨茲特封爾為宜人尚敦祇慎之風益迓駢蕃之寵

制 誥

隆慶元年六月二十五日

大理寺右少卿王諍父母

誥命

奉

天承運

皇帝制曰士有德浮於位而弗究厥用則昌融博大之業必濬發於嗣人國家敷錫之典視其子之秩而追崇焉所以勸孝亦以報功也爾原任松江府儒學教授累贈奉政大夫大理寺左寺丞王鍊乃大理寺右少卿諍之父畢志典墳敦行孝弟教敷振鐸士類藉以甄陶志潔抽簪鄉閭賴之表正慶乃詒於指嗣訓益篤乎義方卒亢爾宗為朕卿士茲特贈爾為中憲大夫大理寺右少卿丕昭燕翼之功永襲龍章之賁

制曰人子懷罔極之德而欲報之其心豈但已哉乃仕宦益進而風木之思逾切則追錫之恩固當有加無已矣爾贈宜人邵氏乃大理寺右少卿王諍之母儀度矜莊性資慈惠主中饋而無遂相助奠而有齊篤生哲人躋位通顯顧梧捲之澤猶在而鼎釜之養蚤違茲特贈爾為恭人冀爾未泯

之靈歆此再申之命

制 誥

隆慶二年四月初五日

之 寶

大理寺右少卿王諍并妻恭人藍氏

誥命

奉

天承運

皇帝制曰亞列之秩望重於象河參典之司任嚴於佐棘必考德而後受惟克勝為至艱而國有慶施固當從懋爾大理寺右少卿王諍真直自持節儉有度茂以家學擢穎賢科始底績於名封繼馳聲於侍御理河東之鹽則弊端盡剔按滇南之部則奸黨潛除睠茲風裁之殷宜晉雲司之職故掄寘棘寺荐歷丞卿乃能報平反之功協簡孚之義以稱予欽卹德意茲以建儲特授爾階為中憲大夫錫之誥命夫法者天下所共廷尉天下之平故皋陶作士刑罰以清于張莅官冤抑乃釋朕固罔知于庶獄爾則克

明於五刑是爾所禪於朕多矣其益懋矜慎期於平允以共登至理則詎惟遠邁前脩其亦得永終譽哉

初任福建興化府莆田縣知縣

二任直隸應天府溧陽縣知縣

三任山東道試監察御史

四任本道監察御史

五任大理寺右寺丞

六任大理寺左寺丞

七任今職

制曰朕觀周之盛時其大夫多羔羊之節則其內必有鷄鳴之助內外既得於相成則恩禮必隆於並逮矧我列寺之貳有敬助之賢者哉爾大理寺右少卿王諍妻封宜人藍氏毓貞華系儷德名賢孝敬以得親心儉勤而修壺政克效中襄之績俾君子無內顧之懷爾賢足褒已茲特封爾為恭人昭淑德之當崇宜明恩之載及

制 誥

隆慶二年四月初五日

之寶

兵部職方清吏司員外郎王叔果并妻宜人吳氏陳氏

誥命

奉

天承運

皇帝制曰朕以宗祧大計肇建儲宮迺霽然發命與天下同其休喜而夏官列屬職方氏稱華重焉褒賞不可或後也爾兵部職方清吏司員外郎王叔果乃原任福建布政使司左叅議澈之子廣東按察司副使叔果之弟能以文學政事世其家聲出綰邑符入更駕署頃朕於踐祚行賞已下所司褒序爾勞比晉今官益祗厥服披方志以飭諸邊之備討軍實以綜北伐之章博識訏謨載以廉實可謂大受之器足參朕之樞務者茲特授爾階奉直大夫錫之誥命於戲惟爾擢英鼎甲自致亨塗玄成之經武子之德庶幾哉奕世而昌矣尚克懋勉酬茲簡在將令爾父與兄亦有無窮之聞焉欽哉

初任直隸常州府靖江縣知縣

二任直隸蘇州府常熟縣知縣

三任兵部車駕清吏司主事

四任今職

制曰婦人之德處貴而不盈者易居約而能守者難朕茲褒錄人臣之配無間死生豈非以其盡瘁微時為尤足尚乎爾兵部職方清吏司員外郎王叔杲妻贈安人吳氏休有令儀作述君子勤而無祿音徽早謝於珮環歿有餘休風法尚傳於圖史一命再命禮實宜之茲特加贈爾為宜人惟新典之荐膺庶徃勞之彌著

制曰夫臣道妻道均有代終之義焉故貞臣三命而益恭良婦歷寵而能戒二者蓋交相濟也爾兵部職方清吏司員外郎王叔杲繼室封安人陳氏系出望閥德為女師相協爾夫既已服官底績矣而夙宵致儆終始克勤有古雞鳴之風焉茲特加封爾為宜人服此龍章永孚燕譽

制
誥

隆慶二年四月初八日

之寶

廣東廣州府增城縣知縣王良心父母

勅命

奉

天承運

皇帝勅曰朕惟臣子效忠于國未嘗不志在顯親故錫命酬庸緣子貴父以示勸也爾王弼乃廣東廣州府增城縣知縣良心之父敦仁好義力學清修一經之遺竟成其子今聞為不朽矣茲特贈爾為文林郎廣東廣州府增城縣知縣綸章有赫泉室用光

勅曰母氏劬勞德為罔極况其躬教育于艱貞者非微寵勞于綸綍何以伸孝子之情哉爾姜氏乃廣東廣州府增城縣知縣王良心之母相夫以正為母而慈節勵柏舟教勤荻畫迨茲寧養宜霈恩褒是用封爾為太孺人服寵榮于翟茀綏福祉于庭闈

勅命

萬曆四年三月十二日

之寶

廣東廣州府增城縣知縣王良心并妻孺人黃氏

勅命

奉

天承運

皇帝勅曰朕之愛民甚雖海隅僻壤亦豈遐遺所為究宣吾子惠之澤者良令責也爾廣東廣州府增城縣知縣王良心性資端亮才識敏明自擢穎制科分符海邑爾操持克慎綏輯有方屢騰薦章屆茲歲閱特授爾階文林郎錫之勅命夫漢旌良吏錫以璽書而登進之今朕遵斯義行且有顯陟于爾尚其懋哉

制曰國家課錄臣勞䟽榮厥配以嘉敬助之賢也爾廣東廣州府增城縣知縣王良心妻黃氏孝恭稟德淑慎宜家爾夫績學服官爾與有助是用封爾為孺人祗膺象服之華益勵鷄鳴之儆

勅命

萬曆四年三月十二日

之寶

錦衣衛 所百戶王如璧并妻 人林氏

勅命

溫州府 府 公 領

勅諭

皇帝勅諭戶科給事中王德近因虜寇侵犯內地在京三大營并各邊鎮已行選將練兵以備防禦尚慮兵有未敷特命爾往山東濟南兗州東昌等府會同撫按官督同地方守巡兵備等官於各州縣原選有馬民快內擇其壯勇量地多寡隨宜抽取令其自帶原操盔甲器械并原騎馬匹另給與盤費銀肆兩其外義勇人民出榜招募有願從者取其鄰里保結每名給與銀叁拾伍兩令其自備軍裝買馬及盤費之用招完之日編成隊伍號為義勇民兵仍量免本家徭役貳丁幫貼軍資其合用銀兩聽所在官司將無礙官銀支給如有不敷從宜均派區處所募人數不必限定多寡止要精壯不可徒取充數糜費錢糧其合用統領兵備叅將等官駐劄地方調發放回期日支給行糧草料等項悉依兵部原議施行仍諭民兵人等到京有功之日並依軍功一體陞賞各該軍衛有司承委官負敢怠玩悞事者即便指實叅究事完將募過軍數造冊奏繳爾受茲選任宜盡心勤事措置有方要使勇敢樂從士馬精銳足為防禦之計如或怠玩稽違徒事虛文無益實用責有所歸爾其欽承之故勅

廣 運

嘉靖二十九年九月三十日

之 寶

皇帝勅諭廣東按察司僉事王德清遠等處一帶地方盜賊生發劫財殺人
為患不小雖有捕盜官負職分卑微未克濟事今特命爾整飭彼處兵備
專在清遠等處住劄往來提督各該軍衛有司捕盜等項官負整點官軍
民快及合用器械等件俱要齊備遇有盜賊生發即便設法擒捕毋令滋
蔓一應調度緝捕事機悉聽爾從宜區處其該呈稟鎮巡衙門及與三司
計議者仍呈稟計議而行該管官負敢有怠職誤事者輕則量情懲治重
則應拏問者就便拏問應奏請者指實參奏爾受茲委任尤須持廉秉公
正己率下務使盜賊屏息居民安妥毋或乖張怠惰自貽罪愆爾其慎之
慎之故勅

廣 運

嘉靖三十年四月十二日

之 寶

皇帝勅諭兵部職方清吏司署郎中事王叔果

朕惟先因薊州等處邊兵缺少該本部具題責令該鎮督撫兵備等官召募
選補每年五月本部奏請差官閱視等因即今防秋在邇特命爾前去薊
州沿邊一帶查照該部原題事理會同巡撫及公同各兵備官照依區分
躬親點視要見已補練過兵數若干是否精銳堪以禦虜逐一查理明白
完日從實回奏以憑處治爾受茲委須殫竭心力閱視精詳如或徇情容
隱苟簡塞責罪有所歸爾其欽哉故勅

廣 運

嘉靖三十九年六月二十三日

之 寶

皇帝勅諭湖廣等處承宣布政使司右叅議王叔果

朕惟

顯陵在湖廣承天府乃

二聖萬世安神之地慎守崇護事體攸重比已設守備留守等官其該道分
守必須特設一員庶官事乃備茲允該部所請特命爾專管分守荆西道

常在承天府住劄協同守備等官嚴督軍衛有司官負人等晝夜用心衛護

陵寢毋得縱人私入侵盜林木及一應有所違犯者爾等嚴加禁治其承天德安二府地方事務有該與守備等官計議者公同計議而行爾宜持廉秉公正已率下令行禁止保護

山陵斯副委任爾其慎之故勅

廣運

嘉靖四十一年四月初六日

之寶

皇帝勅諭廣東按察司副使王叔果

朕惟廣東地方接連海島倭寇不時出沒又有通番運鹽載貨等項船隻往往擅出大洋私通番國招誘外寇偷撈珠池劫殺商客侵擾海濱地方屢為民患今特命爾專一巡視沿海地方東莞南頭住劄公同備倭都指揮等官提督軍衛有司原委備倭巡海捕盜等項官負嚴督所屬官軍民快人等整飭船隻器械操習水戰武藝修葺墩堠整理糧儲禁革奸弊遇有

賊寇生發就便相機勦捕凡海道一應詞訟徑自行提問理發落其所委官負若有怠忽偷安廢弛兵備及私役軍士剋減月糧科歛財物害人等情應拏問者即便拏問應奏請者指實叅奏其餘合行事宜及利所當興弊所當革者並聽斟酌從宜處置爾受朝廷簡任尤須持廉秉公以身率下夙夜盡心籌畫邊務俾海道肅清軍民安妥庶稱委任不許偏執已見因循怠忽有誤邊事爾其勉之慎之故諭

勅命

嘉靖四十三年二月二十三日

之寶

皇帝勅諭都察院右僉都御史王諍今特命爾巡撫貴州等處地方修理城池操練軍馬撫安軍民提督稅糧屯田等項兼理軍務軍士征調疲憊者厚加撫卹夷民復業初定者量為優贍盜賊竊發相機勦捕地方儻遇歲饑設法賑濟所屬官吏有能奉公舉職者量加獎勸貪酷不才者從公黜罰若軍職土官及文職五品以上有犯具奏拏問其餘就便拏送所司究理凡利有當興害有當除者聽爾與鎮守等官從長計議便宜施行如遇

進勦苗賊嚴督各該官員會勦夾攻仍兼制湖廣湖北道所轄辰常靖三府州麻陽鎮寧九永二守備常德辰州沅州九谿永定施州六衛永順保靖二宣慰司施南散毛忠建容美等宣慰司峒子坪五寨長官司四川川東道所轄重夔二府并各衛所酉陽平邑等土官司其湖北川東兵備守巡府縣官員並聽管轄節制尋常無事止行文約束整飭有事用兵隨宜差委策應防禦文武各官俱許舉劾考注湖廣布政司額供錢糧那移稽緩亦許參奏如遇苗賊生發與同貴州總兵官湖廣四川鎮巡官督同該道守巡官協心計議相機勦撫務保無虞爾為風憲大臣受茲委任務體朝廷郵軍愛民之意持廉秉公正己率下俾地方寧靜人民安妥毋或行事乖方自取罪愆爾其慎之慎之故諭

勅命

隆慶三年四月十六日

之寶

7
皇帝勅諭湖廣按察司副使王叔杲近該巡按御史題稱蘇松常鎮四府兵備宜專官管理庶便責成該部議覆相應今特命爾專一整飭前項地方

兵備事務在於太倉住劄往來沿江沿海一帶地方督同軍衛有司掌印捕鹽官負操練官軍揀選民快修濬城池演習水戰督捕盜賊巡捉鹽徒聽理詞訟禁革奸弊其盜賊一事與總兵叅將官計議停當而行凡遇海寇江賊生發即便催促叅將等官調集水陸官兵隨機勦捕以靖地方爾亦要專意海防不許叅謁撫操致妨政務仍聽撫操節制各該所屬官員有廉能幹濟者具奏旌獎貪殘不職者六品以下徑自提問五品以上并軍職叅奏處治其蘇常鎮三府地方所轄運河每年冬初即便督率府州縣管河官調召夫役挑濬務期河道疏通舟楫無阻糧船經過押送至界交代如或怠悞遲滯聽總理河道及僉運御史指實叅究爾受茲專任須殫竭心力紓畫得宜俾武備修舉地方寧謐斯稱任使如或因循怠忽責有所歸爾其欽承之故諭

勅 命

萬曆元年六月初八日

之 寶

8
皇帝勅諭湖廣按察司副使王叔果今特命爾整飭蘇松常鎮地方兵備事

務在於太倉住劄往來沿江沿海一帶地方督同軍衛有司掌印捕盜官員操練官軍揀選民快修濬城池演習水戰督捕盜賊巡捉鹽徒聽理詞狀禁革奸弊其盜賊一事與總兵叅將官計議停當而行凡遇海寇江賊生發即便催促叅將等官調集水陸官兵隨機勦捕以靖地方爾亦要專意海防不許叅謁撫操致妨政務仍聽撫操節制各該所屬官員有廉能幹濟者具奏旌獎貪殘不職者六品以下徑自提問五品以上并軍職叅奏處治其蘇常鎮三府地方所轄運河每年冬初即便督率府州縣管河官調召夫役挑濬務期河道疏通舟楫無阻糧船經過押送至界交代如或怠悞遲滯聽總理河道及僉運御史指實叅究仍查照兵部近題事理帶管驛傳稽覈各項錢糧嚴查應付勘合有不奉公差及假託詐偽并驛遞官吏人等剋削包占作弊害人者俱要恪遵明旨盡法禁治每年將徵給過站銀禁革過冒濫牌票及行過事宜開送巡撫衙門轉咨該部查考如不用心著實舉行取具文移了事致滋奸弊聽各撫按官及該部科即據事叅奏以不職論黜爾受茲專任須殫竭心力紓畫得宜俾武備修舉地方寧謐斯稱任使如或因循怠忽責有所歸爾其欽承之故諭

勅命

萬曆三年八月十一日

之寶

溫州府 國公館

附

吏部行稿

吏部為患病危篤不能赴任懇乞

天恩容令休致事考功清吏司案呈奉本部送吏科抄出原任兵部武選清吏司署郎中事主事今陞湖廣布政使司右叅議王叔果奏臣浙江温州府永嘉縣人中嘉靖二十九年進士隨丁父先臣福建布政使司左叅議王澈憂三十六年起復除兵部職方清吏司主事歷陞本部武選清吏司署郎中四十一年三月初六日陞湖廣布政使司右叅議領

勅陞辭前往念臣世受

國恩年猶未艾豈不欲効狗馬之勞以圖報於萬一但臣稟賦薄弱夙多疾疢近觸冒雨暑跋涉道途外感內傷舊病增劇不得已便道過家就醫調治踰月未見痊可趨赴不前恐瘵曠之罪無所逃遁用是控籲於

君父之前況臣繼母年老且病止有一弟叔杲叨中甲科方出筮仕以情而言臣亦宜留家侍養伏乞

聖明俯賜矜念 勅下吏部察臣病狀的實准令休致庶可保延殘喘無脩

慈養自附華封康衢之民咏太平而祝

聖壽乃微臣區區之懇誠也等因奏奉

聖旨吏部知道欽此欽遵抄出送司案呈到部為照右叅議王叔果年力方
強才名素著正宜乘時以圖報効偶因患病遽求休致似難准理擬合就
行除將奏詞立案及咨都察院轉行湖廣撫按衙門外合行照會本官不
妨在途調理作速赴任供職不得以疾為辭仍將供職過日期呈部以憑
查考施行須至照會者

右照會湖廣布政使司右叅議王叔果准此

嘉靖四十一年九月二十六日行

又

吏部為患病危篤不能赴任懇乞

天恩容令休致事考功清吏司案呈奉本部送吏科抄出原任湖廣等處承
宣布政使司右叅議今陞廣東提刑按察司副使王叔果奏臣原籍浙江
温州府永嘉縣人中嘉靖二十九年進士歷任湖廣布政使司右叅議本
年三月初五日接到吏部急字七十二號文憑陞授廣東提刑按察司副

使臣感 恩懷惕聞 命肅趨本月十二日行至江西九江府地方不意宿疾大作痰火內蒸寢食俱廢精神眩瞶醫藥罔功勉強赴任則匍匐不前欲僑寓調理恐曠職誤事進退狼狽衷情迫切用是敢冒

雷霆之威妄為骸骨之乞念臣本以草茅致位藩臬仰際

聖明振刷官衷偉免汰斥正當夙夜砥礪勉效涓埃豈敢矯情好遜以自負於 明時哉顧臣病勢沉綿非旦夕可愈而地方正屬多事前職豈宜久曠使臣依違觀望不早自引決則妨賢誤事之罪益無所逃矣伏乞

聖慈俯賜矜念 勅下吏部察臣病狀的實准臣休致另補前職庶殘喘得以苟延而厥官不致有曠也等因奏奉

聖旨吏部知道欽此欽遵抄出送司查得近該提督兩廣軍務兼理巡撫兵部右侍郎兼都察院右僉都御史吳桂芳題為議處海道憲臣以全器使事內稱廣東海道副使劉存德近被巡撫南贛都御史陸德論劾已該吏部題奉 欽依間住今王叔果之補廣東意此缺也謹按叔果為人清謹文學優長以之司文墨學校之官真足為士子之範模振詞林之藻思可謂曰宜且其性資恬靜氣質充往年自兵部郎中出為承天分守叅議

即以身不耐勞意圖休致遷延久之而後即任臣撫治勦陽時蓋習聞之
今廣東為炎瘴之鄉既非氣體羸弱者之所宜居而海道有剽捕之責亦
非禮樂優游者之所能辦以臣揆於叔果聞此遷轉不免復有浩然之志
縱使強令前來誠恐風氣非宜展布不逮非所以全叔果也乞量其才質
推補別任前缺另推相應官員陞補庶器使適宜地方有賴等因本部覆
奉 欽依將本官別候相應員缺推用通查案呈到部看得原任湖廣布
政使司右叅議今陞廣東提刑按察司副使王叔果奏稱患病危篤乞要
休致一節為照本官負性恬淡積學淵醇中外敷歷清望久著近該本部
題覆聽調正欲用之相應職任以俟後績今乃引疾告休遽難准理除將
奏詞立案及咨都察院轉行原籍撫按衙門外合行照會本官一面調理
仍遵照

前旨聽調施行須至照會者

右照會廣東按察司副使王叔果准此

嘉靖四十三年四月十三日行

諭祭文

維嘉靖十七年歲次戊戌三月甲戌朔越望日戊子

皇帝遣本布政使司堂上官右叅政龍大有

諭祭國子監祭酒王激父封通政使司右通政王鉦

曰惟爾資性溫純行履方潔丘園晦跡鄉里稱賢善積厥躬慶鍾令子蜚聲甲第荐歷華階義方足徵褒章屢錫允惟壽考久享安榮茲以令終夫復何憾爰推子績賜祭爾靈仍命有司為營葬域九原不昧尚克歆承

維嘉靖十四年歲次乙未十月己丑朔越八日丙申

皇帝遣本布政使司堂上官右叅議姜儀

諭祭國子監祭酒王激母封太恭人張氏

曰惟爾淑慎有則順正無違毓秀相門作配高士德範宗姍慶延胤祚伯仲競爽宣勞邦家齊壽考終哀榮式備特賜祭葬用昭渥恩泉壤有光爾其歆服

欽降褒忠祠祭文

維某年月日

皇帝諭祭于

勅贈太僕寺寺丞王沛

曰爾率眾禦寇委身死事爰軫忠義特為建祠茲當仲秋春遣官賜祭爾靈不昧尚其來歆

欽降愍忠祠祭文

維某年月日温州府知府某欽奉

朝命致祭于

廣東按察司僉事

誥贈太僕寺少卿王公惟公身雖家居心存為國奮擊倭寇力盡殞亡追

憶忠誠建祠以祀時當仲秋春特具常儀尚享

附

封通政溪橋翁配祀漢東甌王行廟歲冬至日永嘉場催竈致祭文

維是海邦萬竈攸籍仰賴冥休亦資顯德惟

王與公於昭並赫有害斯除有利斯迪曠世感孚一方載翊懷德念功報

賽無斁

東嘉英橋王氏族譜

九世孫叔果撰

文紀

敘曰夫所謂世家者有三曰開先曰垂裕曰濟美非譔述曷闡焉而
內則則家之基也胡可遺耶述文紀

世傳

萬十一府君傳

我王氏世居永嘉英橋里舊傳五代唐時自閩來徙近傳自台之寧溪吾
鄉宋季罹兵火宗譜散亡今以萬十一府君為始祖宗所知也府君諱惠
字振卿世出瑯琊後系生于宋理宗寶祐五年丁巳卒于元順帝六年庚
辰壽八十四歲府君行事久而失傳追惟啓宇茲鄉昌我胤祚奕葉百千
文武濟美不有明德長者積慶基仁孰能顯其世哉然則府君之德厚殆
天所栽培者矣配安人陳氏合葬里之西門洋子三人長諱仕宜次仕朋
仕信

肅一府君傳

肅一府君諱仕宜字東疇元時以行誼推為鄉正家饒貲產卜葬地于西門洋負山面湖堪輿家物色謂發祥由之貽謀亦可稽云生元大德十年丙午卒我明洪武二十年乙亥壽九十配安人吳氏子二長樂善翁諱珎次樂靜翁諱安宗樂善翁子孫登甲科占仕籍者若干人具都御史王公世貞譔樵雲府君傳中樂靜翁裔孫良心繼明於隆慶辛未萬曆甲戌相繼成進士

3 樂善府君傳

吾王氏三傳為樂善翁諱珎字伯玘端謹諒直慎許可以長厚表于宗嘗曰吾於世無他好獨有善耳人咸稱樂善翁翁性孝友起家崇儉約於義舉則勇為之闢家塾群族子弟肄習修橋梁堰道築方泮陡門事具金紀善所撰誌中生平鮮疾病年既耄而耳目聰明讌客觴咏不減少壯一時名流咸推重焉生元元統二年甲戌卒我明永樂二十二年壬寅壽八十九配安人胡氏先卒祔葬西門祖墳繼吳氏合葬膺符鄉半山子一諱毓胡氏出嗚呼翁善行徽猷讀其遺誌核且悉矣范文正公謂積德百餘年而後發吾宗子孫所承席於翁者是可以弗念哉

樵雲府君傳

樵雲府君諱毓字尹成葬父樂善翁山中廬于墓側顏曰樵雲人稱樵雲
處士性至孝樂善翁教之嚴朝夕侍膳必衣冠儼立烹飪稍不當翁意輒
夔夔跽請承順曲至嘗作三檜堂為翁壽少保黃文簡公書卷紀其事同
邑給事中方公祖元誌墓畧云王處士性警敏慈惠聞義勇為里人事多
就曲直好調人之急族里中老而孤嫠者貧窶者生有給死有賻婚嫁有
資里嘗失火一望為墟輒指廩賑之賴聚活者數十家其好行陰德類如
此善詩歌所著有槐陰集蛙鳴鼓吹尚書章恭毅公序之梓藏家塾配安
人謝氏子七人長諱環次諱瑤三諱琛四為果高祖諱珙五諱璩六諱由
七諱城女一適御史鄭公道寧子璣府君志行卓犖規猷宏遠為樂善翁
卜宅兆得半山厚購之堪輿家稱為福地里居負山瀕海初為灌莽之區
府君胥宇以居諸子區分疇列方數里之間煙火相望今則鱗次櫛比井
然成巨室矣貽謀肇緒是可忘所自哉府君生元至正庚子卒我明宣
德丙午壽六十七祔葬半山詳具都御史太倉王公世貞傳中
自足翁傳

自足翁諱環字秉圭性質直易諒行不忤物居嘗自誦曰天錫我壽復錫我福淡淡平平我真自足於是人稱自足翁兄弟七人翁為長友愛甚篤歲時歡會醉輒嗚嗚起舞侍父樵雲府君居異第旦夕往省候雖雨雪無間日造謁適府君盛陳白金几上翁逡巡却武府君曰若何嫌乃爾翁曰不欲與弱弟較也固命之取一金而退狀元周公旋徵時讀書姚溪集善院翁過聞書聲異之曰是非乾沒者因時餽致意焉生平敦尚謙厚尤樂賑卹人詳具劉容直所撰誌中正統間應詔輸粟助邊授登仕郎郡邑禮以鄉飲賓晚年委家長嗣貞菴公貞菴公嚴飭家人多畏懾而翁則一於寬和迄今人猶誦其盛德事云生洪武甲子四月十八日卒景泰丙子十一月一日壽七十三子孫數百人於諸派中最蕃至曾玄而登科第者遍見矣

平五府君傳

平五府君諱珙字秉信偉狀巨顱有膂力敦信仗義能急人之難然性度恢弘家有舟一族子告假府君已諾鄰人約因謝之族子怫然乃潛穴其舟兄某翁顧府君聞狀促往視府君唯唯置不問第屬家人供具款兄竟

日盡歡而罷孝友篤至乎於鄉族其德厚有容迄今長老猶誦稱焉生洪武壬申七月一日卒景泰辛未五月二十二日壽六十配安人宋氏祔葬半山祖塋翁六子次為果曾祖諱封府君起自隱約而右啓後胤世叨恩榮里中人嘗見其長老談府君行事者謂平五翁後宜昌顯是其所培植者豫矣豈朝夕之故哉

夢竹翁傳

子孫附

夢竹翁諱由字秉璠樵雲府君六子也敦行好義以豪傑自命樂交搢紳名士郡辟為陰陽正術樂清章恭毅公景泰中疏請朝南內復儲宮大忤上旨下詔獄時勢嚴甚無敢訊問者翁適在京師乃奮激於義因所知密

訪於獄出所懷貲為朝夕供饋復厚畀其僕俾善事之後恭毅公以忠業顯深德翁解官歸嘗顧訪為翁記所居槐陰堂道其事焉翁家居敦禮約族輯宗譜刻槐陰集以幹蠱稱若承官司委屬昭雪誣枉處鄉族調貧恤

窶諸善行詳具章方伯曼亭先生所撰誌中翁生永樂丙戌卒成化癸卯

壽七十八子四長竹雪翁諱基字廷載次復樸翁諱塾字廷雖竹雪翁純孝秉禮有古人風夙綜家政業日裕後悉以均異母弟友愛篤至嘗奉例

輸粟助邊郡立石旌之壽七十八為鄉飲賓復樸翁敦尚古雅夙持檢鏡
果叔祭酒公幼齡或以數竒見貌翁能甄識之謂後當大就少師張文忠
公雅重翁延譽當道郡邑禮為鄉飲大賓嘗抵郡城有鄉民林福鬻妻得
二十金將以償官逋偶遺道左翁拾而還之艾年喪耦不復續燕處一室
散帙焚香庭列蘭蕙時寄懷吟咏而屏謝塵雜條然有隱君子風焉壽八
十四復樸翁子橫塘公諱錫字仲美馴雅好古旁通群籍而尤悉心禮儀
嘗著精思錄以示臆裁晚歲應貢至京緣末疾乞授教職以歸歸二十餘
年乃卒壽八十四竹雪翁有孫聽松公諱鴻漸字崇羽言行恂恂篤於孝
友祖遺有祭田矣念身承宗祀又割腴田益之宗屬以寔急告不靳賑卹
而敦尚儒雅尤臭味於斯文論者謂夢竹竹雪二翁之緒得公為一光云
論曰予昔宦京師見恭毅公裔孫刑部郎南岡君朝鳳謂公繫獄時瀕
死者數矣即親屬虞禍出不測莫敢向邇夢竹翁於恭毅無平生乃竭
情周旋其間此在搢紳猶難之其義槩可眇視哉翁行誼類多可稱此
其卓犖者厥子孫能世脩弗替所以承天祐者有在矣

時齋府君諱封字廷睦生永樂壬寅正月五日卒天順癸未八月十三日
配安人周氏子四長為先大父通政公諱鉦果少侍先大父詢府君行履
大父揮涕曰府君卒時吾年甫十四何能詳哉然性度儀範猶得於追憶
云府君惇謹而篤於孝友視諸庶弟不少失顏色與人恂恂寡言雅尚儒
素人率愛而信焉又聞之先君曰吾侍周安人安人嘗言通政公簡靜慈
惠類時齋府君而狀亦肖之嗚呼吾家自列祖以來宅心操履多務厚善
先君每日誦為子孫法乃今席餘慶駸駸稱休顯矣考祥論德是可忘厥
紹哉

9 中制翁傳

中制翁諱鏞字九韶古朴翁子也古朴翁以齒推為族長族諸不平咸詣
決翁和煦率唯唯中制公端方剛毅則贊決枉直聽者咸稱服族有私訾
竹雪翁者公聞之曰竹雪翁長者可私訾耶即召其人撻之族徭充京解
公使非其人稱餼百金仍途質官批公曰是過由我不可累族屬乃出已
貲竣其事嘗長里賦里人貧窶者率代輸或以窘急告則勉力應之弗較
也古朴翁卒七弟一妹弱不能事公內撫衣食外嚴訓教諸弟從鄉學歸

必詰日所記誦妹則課之經紡門內雖爾無間言鄉人服其德稱為中制
公詳見都御史惠安張公岳所撰傳中子清為太僕寺寺丞

鑑水翁傳

鑑水翁諱鈇字九巖吾王氏宗子也淬志礪行篤於義初大宗祠遵行家
禮歲時烝嘗必昧爽將事後至者有罰立族範子姓有忿爭率就祠決其
枉直罔不輸服雅尚斯文尤樂於與進宗伯甌濱王公少時汨沒鄉學中
翁造其父梅軒封君試之耦語謂梅軒曰而子遠器也因資之學太守蕩
南朱公方為諸生翁邂逅郡城大器之邀館寓所仍給其不時之需二公
後以功名顯時謂翁為知人居嘗玩好圖籍凡古今遺編名筆悉致珍藏
之善詩歌時與鄉之耆彥葉梅屋輩為詩酒會投壺散帙譚論酣咏超然
有達士風築樓於宗祠之東顏曰鑑水因號鑑水居士

封通政溪橋府君傳

溪橋府君諱鈇字九思以先叅議諱澈及仲氏祭酒澈貴累封中憲大
夫通政使司右通政府君年十四而孤家故貧事母周安人撫諸弟孝友
篤至與人寬廣愷易渾忘物我而秉正操介是非淑慝則炳然於衷焉晚

年二子官華顯府君以齒德尊屏迹鄉居部使者監司諸大夫先後造訪
聲燄熏灼而府君謙謙辭謝如無位人性喜音樂畜歌僮調演雜劇時集
昆朋為懽率夜分忘倦俗元宵城市張燈好事者書隱語取娛府君天質
穎敏一覽輒解而言色愉愉無賢愚貴賤皆樂與親得其笑語則傳以為
快云家居崇禮收族葺始祖墓置墓田祠田新高祖墓廬諸所規為期足
垂裕永久鄉人以瀕海故隸竈籍困于鹽課府君疏于朝請輸本色均
折色以恤竈艱覆議如所請詳具大學士華亭徐公叅政晉江王公所撰
傳誌中生景泰庚午八月二十一日卒嘉靖丙申七月二十二日壽八十
七以仲氏 經筵講官

特恩 賜祭葬里人祀于社中漢東甌王行廟配張氏 封太恭人

師古翁傳 子附

師古公諱銓字九衡端方莊毅居常沉默不妄語笑性嗜學家無贏貲而
勉致群書行卧必偕遇疑義則劄記待問老而靡倦教授于鄉鄉子弟皆
受益焉居父古愚翁喪寢棺號泣三年卧不解縗經食不如葷執禮盡恪
先大父溪橋翁與公比鄰朝夕過從相愛敬果兄弟髫年從公受句讀其

端肅儀範至今猶想像焉郡邑賢其行禮為鄉飲賓里人稱鞠躬君子必
曰師古公云公二子長冽字子良別號仁峯以選貢授松江府儒學訓導
陞建安王府教授遂謝歸持身端慎居家孝友論者謂有父風次澹字崇
白別號白雲少負慧質有逸志晚嗜仙釋語善書詩詞多清曠遨遊山水
間所至輒題咏惜其稿多散佚焉

13 贈大理少卿晚春翁傳

仲子附⁷

晚春翁諱鍊字九純祖家英橋徙居五都丁家舉食貧力學正德季由貢
起家嘉靖間歷官山東諸城訓導湖廣竹山教諭直隸松江廣東南雄教
授宦游幾二十年乃乞休居林下又十八年子都御史諍登嘉靖庚戌進
士時翁年八十一次年卒後以子貴 贈山東道監察御史加

贈大理寺寺丞進右少卿翁性倜儻剛正不屈於人先任諸城故規校官造
邑庭由中門入陝西李公宗樞來為令治尚巖峻儀門中橫木欲校官從
旁入翁至門呼從者去木仍由中入李怫然辯論久之竟弗釋未幾代巡
朱公按諸城舊識翁而翁未之知也一日留翁茶密詢令賢否翁歷舉李
公賢能以對而門役竊聽之李初虞翁必乘間中傷既而門役私以告李

造謝遂為知己官竹山值歲歉穀直騰甚發倉粟給諸生時有孔州守奉檄按查欲罪之翁不能俛屈守以預支報罪當道原而不問議者咸韙其事所至遇諸生以恩義不問疏密見必留酌極歡而罷貧士歲餽盡却而時有以助之舉於仕路會翁舊所從游士友多道其行事之賢如此既歸而搢紳訊問者猶數數也目不識等秤口不問錢穀第以節儉訓諸子孫性嗜酒微醺即止嘗署其燕居之門曰酒盃常在手世事不經心隱然有陶彭澤風焉子四人仲公諱誥字子宣生平朴約孝友出於天性都憲公雖貴顯公屏迹安分未嘗挾以侮人劉瑞安周永嘉以年誼請見固謝不出或問其故公曰一揖之榮不能償一跪之辱也我何為見之都憲公令溧陽嘗往訪瀕行贖以二十金不受祇受一紵衣而行有富民陸姓餽茶一筥中藏白金一錠公覺而卻之曰無汙吾弟名也其廉謹長厚足為家法卒壽七十三族私謚曰隱德亦實錄云

寺丞海西翁傳

子節推公附

海西翁諱清字子介弱冠游庠校有聲七試不第正德間應貢入太學嘉靖初歷官州郡以廉勤著稱當路採諸論薦擢為南京太僕寺寺丞翁時

年甫耆而精力均少壯鄉少師張文忠公方秉國鈞吾仲父祭酒公又官
吏部翁乘時邁會可希冀上進乃以慈養乞休致生平操履端謹坐立不
側簡默凝靜即之知為長者林居益自歛抑屏謝外事郡邑禮以鄉飲大
賓辭不赴終其身鄉族搢紳多愛而敬焉壽七十九伯子敬齋公諱良弼
字希說少穎異有大志治詩補郡庠廩膳生力學脩行數試不第由例貢
入太學嘉靖庚寅秋 詔以災異求直言公上陳太平十二事諸搢紳多
器之乙未秋授廣東廉州府推官清苦勤勵疑獄多所平反時廷議討安
南密邇廉壤公募士治賦密堆保境事雖戒嚴而常若暇裕者廉守淨峰
張公來為浙學憲嘗向先大夫稱賞如此生弘治壬子六月二十三日嘉
靖庚子冬入 覲行至南雄卒于官邸年四十九

15
叅議東厓府君傳

先府君諱澈字子明別號東厓少穎異篤學弱冠負士望正德癸酉舉于
鄉嘉靖丙戌仕為禮部司務歷陞兵部車駕司員外郎武庫司郎中時少
師張文忠公為首相府君以舅甥姻愛乃退然歛抑陰扶善類搢紳至今
稱之乙未歸省尋擢福建布政使司左叅議侍大父母壽終遂疏休致府

君簡靜莊重而澤以中和近人豈弟隨貴賤即之誠意懇至謙謙靡盈而篤於仁義林居幾二十年日惟推羸振乏敦禮修德為事建宗祠行族約覈宗賦施荒粥凡鄰里急難及境土利病所宜興革者輒以身肩之果嘗狀府君曰孝友刑于家溫恭慈惠孚于族純誠厚德洽于鄉鄰姻戚賢聲義聞傳頌于遠邇搢紳噫斯足以槩府君平生矣生成化癸巳九月三十日卒嘉靖辛亥九月十三日壽七十九配恭人潘氏合葬十九都宋舉卒後九年果以兵部職方司主事滿考加贈府君朝議大夫詳見誌傳子二人叔果叔杲吾鄉自入國朝兄弟無同第者府君槩祭酒公以科甲起家果兄弟並登進士鄉人稱為世美云

祭酒鶴山翁傳

祭酒公諱激字子揚別號鶴山天質穎異書過目輒成誦甫垂髫能為古文辭弱冠與先公並負士望正德丁卯以春秋舉浙江鄉試第二人屢上春官不第遊兩都名動公卿間許公台仲金公汝白應公邦升諸君子相為道義交因徐公曰仁朱公守中問學於陽明先生郡守陸公鰲高公文行乃卜地于城隅之慈山構鶴山書院居之公下帷聚徒暇則撫松調鶴

若忘仕進者學者稱為鶴山先生嘉靖癸未以詩經登姚涑榜進士令吉
水治先教化每聽狀多引古人誨諭俾自改釋不盡繩以法民樂其簡靜
久之發境內兇人王璇革置之憲典而衆又驚畏政暇課諸生讐校經義
愼菴羅先生時為諸生公試其文賞識之館之邑署與子叔懋同學丁亥
擢吏部文選主事戊子奉命典廣東鄉試尋晉考功郎中殫咨訪慎黜
陟尤務獎拔幽滯海鹽澹泉鄭公四明東沙張公咸藉推轂後皆為名卿
滿考晉南京通政司通政轉北司膳黃以材望改國子祭酒兼
經筵講官在國學端範崇教振作有方四方名士多出其門衆方以公輔屬
望公念大父母並高壽屢疏乞終養

上感其詞懇允之歸承懽侍養踰年乃宅憂嘉靖丁酉以疾卒壽六十二公
長身玉立少負奇氣慨然欲自表樹檢身過於澡潔視一切庸猥委瑣若
有所俛者生平忠孝大節文行徽稱為海內所宗仰顧天嗇其年位未副
德然身名兩完出處亦光偉矣所著有文江集鶴山文集若干卷
贈寺丞仁山翁傳

仁山公諱沛字子大慷慨端方有大畧動希古人天資穎敏每談說物理

至天人之故能臆測不爽先公伯仲並位通顯衆方歆豔公處之澹如課
耕橫塘之上時與同志徜徉泉石間仗義樂施人以急難赴者隨應不懈
常客枯蒼有江右富商雲山同舍疾劇歸遺百金公拾獲踰年雲死其子
來謁悉還之先公建宗祠行族約公以年德並茂推為族正族有爭攘及
鄰里不平事咸取平於公公開誠執理剖之罔不輸服嘉靖壬子以來倭
擾海上沿海居民皆望風奔竄公念先世祠墓所在乃集鄉子弟為義兵
肄練之冀保障一方既而族子僉憲東華君自嶺南歸議與公協益毅然
為備寇計丙辰十月倭由南溪抵龍灣勢出奄忽衆懼甚公與僉憲君率
義兵禦之上金寇潰蹈海去收回馬十餘匹及被擄數十人吾鄉義兵之
聲遂傳遠邇甌諸鄉數年多苦倭患而永嘉場百里獨晏然公之力也鄉
士民狀公行誼郡縣禮為鄉賓辭不赴時公年踰古稀而英氣若少壯戊
午夏倭復大至登岸焚劫勢甚熾吾鄉密邇寇鋒或勸公當暮齡宜入郡
城少避公弗然之及聞寇薄梅嶺遂偕僉憲君率衆往禦寇佯為退僉憲
君分兵登山前瞭公留駐半嶺寇猝突圍寡援遂遇害移刻諸義兵與公
歸哀震閭里郡邑士民亦靡不咨嗟喪氣以為鄉邦翦此首領也總制胡

公遣官弔奠特疏聞 詔贈太僕寺寺丞立祠 賜額褒忠命有司春秋
致祭廕子叔本入國子學公偉幹脩髯英邁倜儻平居語及忠節輒撫掌
軒眉卒以死事膺卹典血食百世是可以慰公靈矣措紳贈誄諸文梓為
褒忠錄

封大名推官橘泉翁傳

友梅翁諱錫以貲望于鄉子二長雙溪公諱漢為直閣序班子有慶世其
官次橘泉公諱浥字崇國以子廣東僉憲德貴 贈文林郎大名府推官

橘泉公性曠達承先緒不事生殖第勤於訓子延師收群書多費不靳而
家日以落人或竊議之公不恤顧厚自期待且以語人未幾僉憲君連第
而公年甫艾乃益率真履坦日聚昆朋為懽陶然有葛天無懷風焉公篤
大義視雙溪公敬甚與人無他腸緩急有需輒應錙銖委瑣悉置不問好
集古方書旁通醫術常以藥施人僉憲君司理東昌迎公養以疾終于官
邱時嘉靖壬寅六月二十九日距生成化丁未六月二十六日壽五十六

玉山竹泉友翁三公傳 觀復子附

居易翁五子長漁樂公起家豐貲次履素公以上壽尊於鄉履素公長子

玉山公諱根字國茂言行端慤孝友孚于家持門戶事公平率人為族黨
 所信服雖不事表暴而朴茂長厚迄今人猶頌焉次子竹泉公諱揮字國
 器操履端恪辭氣雍容綽然有大雅風老年益務韜匿然以禮意周旋於
 姻族者則不遺焉昔人稱金昆玉季公伯仲殆有之矣漁樂公次子友菊
 公諱撓字國渡宅心平直外渾樸而內實介然視長兄如嚴父於諸弟姪
 則恩意周篤臨財至明寧損己不欲錙銖負於人訓諸子學甚勤皆英英
 穎發矣而弗獲食其報晚歲家漸落而恬然處之惟種菊自娛人稱友菊
 居士友菊公伯子觀復君諱勳字景銘溫純靜默弱冠有志聖學力踐精
 思手錄先正格言及平日所自得者曰檢身集用自證考雖隱微造次必
 儼然端飭孝友天至與人一於誠恪鞠躬秉禮鄉族孚而化焉早游庠校
 負士望卒年三十二邑士撫其遺行上之督學阮公表其廬曰善士我王
 氏祖先德厚稱自足翁三公高祖也自足翁裔曾玄以下宦業日顯若三
 公繩武惇善觀復子篤志適道太史公謂問巷之士砥行立名者非耶

僉憲東華君傳

僉憲君諱德字汝脩別號東華少英異有大志十五游邑庠弱冠舉嘉靖

丁酉鄉試戊戌進士庚子授山東東昌推官衆以少年易之君事至立斷發奸擿伏有能聲尋丁外艱執喪盡禮丙午起復赴京為鄉試同考官丁未補直隸大名推官時河南新鄉盜掠湖廣貢金守臣奉 旨捕盜甚嚴滑人鄒輔等誣逮株連數十人君下車甫七日自府馳滑驗無實庇之未幾而真盜獲於京師滑立祠祀焉戊申滿考會選臺諫君引嫌不赴部考已而授戶科給事中浹旬上疏請簡輔臣薦遺佚人才為當國所忌嫉巡視光祿三月省無名費數萬金庚戌北虜入擾畿甸君條奏十餘事

旨下多允之隨奉 命募兵山東遣 詔舉才望朝議推君將不次用而忌

者竟出為廣東按察司僉事兵備嶺南至則率兵勦勦村堡聲烈震于廣中屬以議獄與撫臺相左遂謝病歸其毅然耿介之操終始不渝也嘉靖壬子以來倭擾海上主族議集義兵待之戊午夏倭圍郡城率兵往援行至金嶽伏起遇害時年四十二撫臣上其事 詔贈太僕寺少卿立祠春

秋致祭 賜額愍忠廕子錦衣衛百戶世襲君孝弟博大言動端肅居官著冰檠聲歿之日家篋蕭然尚論者謂忠孝廉節東華君踐之矣子二人如珪世其學如璧官錦衣千戶詳見誌傳

內傳

陳吳二安人傳

我始祖萬十一府君配安人陳氏行德四生于元世祖至元十九年壬午十月十七日辰時卒于元順帝至正十八年戊戌正月二十五日午時壽七十七萬十一府君年五十始生肅一府君配安人吳氏行正二生于元武宗至大二年己酉七月一日未時卒于我明洪武二十五年壬申十二月三十日戌時壽八十四祔陳安人葬本里西門洋子男二長諱珎次安宗夫家族之昌莫不有內德焉二安人懿行故失傳而克襄啓宇昌茲似續徽音淑範百世可想見已閔宮姜嫄之頌著周人之所由生我王氏奕葉百千始自二安人毓慶發祥是惡可以弗念哉

謝安人傳

謝安人自少知孝敬事母王安人能相中饋及歸樵雲府君脩婦道慈和靜正家庭無違言歲時佐祀事供具惟恪訓子女以大義凡舉動必閑於禮家雖饒裕而綜理勞勩以身先之於姻族鄰里慶唁賙卹又周旋弗倦焉府君好交游陶情詩酒無內顧憂者以安人善助也早歲未育輒勸府

君為廣嗣計納姑女楊氏為側室撫愛特至視其子如己出平生無微疾
迨耄年猶事經紡以勤儉率子孫云生元至正辛丑正月九日卒我明
正統戊辰十一月四日壽八十八子七人長環次琛三瑤四為果高祖諱
珙五璩俱安人出六由側室楊氏出七瑛庶出女一適鄭瑗孫二十八人
曾孫九十四人名具世系

周安人傳

時齋翁配安人周氏世家沙村鄉進士周君感祖姑也安人三子長為我
先大父通政公諱鉦次鑰鑛庶子鑣通政公年十四而孤諸叔祖方免懷
抱伯叔同居者又弗憫間肆陵侮安人含哀茹苦誓志貞守撫諸孤慈而
能教及子婦完聚安人老而彌康弘治四年辛亥先大父遷居橫塘橋堂
構宏新而先君伯仲文譽日起正德丁卯仲父舉浙江鄉試第二人時安
人尚無恙諸母氏率雍雍承慈訓內外無間言家畜黃犬犬育兒每犬出
一牝雞來以翼覆之饑則啣飯哺之犬歸以身環雞居其中狎如同類庭
前兩松僅拱把嘗綴甘露識者占為蕃昌之徵云安人貞靜純懿晚年家
道浸興似續日盛眾咸以為榮顧自安朴素諸孫以華綺進輒屏去曩時

侮者多窘乏求濟安人猶憫而周之不厭數也生永樂癸卯十一月三日卒正德壬申七月二十五日壽九十二

4 張太恭人傳

太恭人張氏先世自閩徙于溫居三都滄湖與吾王氏同里閉先世隱德未顯自少師文忠公始以進士起家嘉靖初拜相恭人之季弟也曾祖諱轉寶祖諱敏父諱昇俱 贈光祿大夫柱國少師兼太子太師吏部尚書華蓋殿大學士曾祖妣王氏祖妣徐氏妣高氏繼陳氏謝氏俱 贈一品夫人恭人少失恃事二繼母孝已謝夫人復卒少師公尚幼恭人撫之成立有兄之愛有母之親焉年二十歸先通政溪橋翁起居相賓敬室無迂言事我大母周安人孝養備至旦夕供順不違左右諸叔氏孱弱恭人視之情義甚周皆撫有而室族子弟往恭人側必訓之儉約至見人窘迫則慨然捐施雖販夫丐子亦以恩意存恤之靡厭也族婦葉氏嫠而苦節舅欲迫其嫁恭人聞之瞿然曰賢哉此婦而可不成其志乎趣先通政往喻止之厚恤終其身竟以節顯恭人性嗜澹薄不豔榮利澈兄弟初第族人群會恭人不矜喜顧持一二寡賴者咨嗟泣下晚年少師公位元輔澈官

兵部郎中激官國子祭酒被 恩拜封誥鄉族皆為恭人榮而恭人若忘其貴凡問訊惟以居官得失為事無旁言少師公三已四召每告行恭人諭曰爾好為 朝廷作福其明於大義以德業勸勉子弟如此後寢疾澈徙福建叅議過家激以侍養乞歸而少師公亦謝政還第聚首數月乃終時嘉靖乙未六月十六日距生景泰癸酉九月十五日享年八十有三與先通政並壽云

嗚呼此先大夫手筆也大母賢懿大畧具矣果何敢贊辭哉若委細不能殫述然率為鄉族所傳誦焉

邵太恭人傳

太恭人邵氏族祖松江教授晚春翁配叔氏都憲公諍母也世居丁家壩晚春翁就茲徙居故貧也恭人能安之惟朝夕拮据四時家祭必躬治蠲潔晚春翁好客客至則山肴野簌取諸宿有人不覺其貧也及翁祿仕諸子成立似可充誣矣而澹樸之性無改焉暮年猶事織紉或勸其優逸則曰我固習而安之奚勞耶待諸子最嚴至視諸婦則如賓終身不加忿厲聲族子姪及中表諸幼有事來謁恭人煦煦款存之而宗黨姻屬無問戚

疏莫不誦其慈惠果數從都憲公宦游聞恭人懿行之畧如此子四人訓誥誠諍諍登第授官歸省恭人尚康健再踰年而考終時嘉靖癸丑三月十一日距生年成化甲午十月十四日壽八旬沒後累 贈太恭人

潘太恭人傳

先母太恭人潘氏世居吾鄉龍灣里幼莊慧嘗授句讀于家塾能解大義歸我先公東厓翁先公蚤為諸生家故涼薄大父母在堂二叔如合爨而食恭人佐以勤儉承以孝敬閭內事無問巨細公私悉以躬先大母張恭人賢之曰冢婦固宜爾先公屢試未第且艱嗣恭人慰之曰置媵為後計君其圖之功名遲速有時需焉可也先公年四十一舉于鄉再踰年連育果與弟杲先公初仕恭人以侍養大父母不從行既而先公歸省欲携果兄弟就學於京恭人乃偕往尋以疾卒于京邸時嘉靖甲午五月十四日距生成化丁酉正月十二日壽五十八恭人性端惠而識曠達嘗苦宿疾際先公宦游內外綜理酬應甚周而有條先公故舊眷屬以急難來依者竟歲款之不少厭而恩意逮於姻族者則無間疏戚也恭人晚舉果兄弟心雖愛而不為姑息童時俾毋逐群兒戲及就外傳聽塾師督策不求寬

假侍膳大父母必別餐以糲飯曰人口無常不可使慣甘美年饑里中多飯麥令果兄弟亦飯麥曰庶知稼穡艱難也既弱冠未嘗衣紬帛曰爾固布衣時欲須美服努力向學可也嘗舉先公及仲父微時事勛果兄弟曰爾父叔有今日者皆勤苦中來也故果兄弟雖不肖而能甘澹泊耐勞頓視一切戲慢事若有不能者實恭人之教使然也先以先公官兵部武庫郎中封宜人沒後二十三年果以兵部職方司主事滿考贈太恭人邵恭人朱安人傳

邵恭人世家膺符鄉歸我仲父祭酒公仲父初為諸生不問生產既而舉于鄉困躓又十餘年家無贏貲恭人安於素約後貴顯矣而悃悃真率無改於初恭人孝敬內慈惠而外質直視僕御不加嗔怒家庭上下咸樂其恩愛焉仲父歷宦中外恭人皆從行比自南通政改北膳黃恭人以大父母高壽在堂乃與子叔懋叔程留侍養尋以疾卒壽五十七朱安人世家郡城鴈池里少孤奉母孝視兄及女兄篤於友愛既筭歸我季父寺丞公甘執勞勩致孝養季父性嚴毅安人佐以慈和且儉約自將至供賓祭則豐潔恆貧匱則推解無靳姻族間里咸賢而誦之安人體素羸多疾所居

室密邇外堂日常就內坐卧外人絕不聞其聲或問何能常爾則曰吾幼奉長兄教習慣矣早歲艱嗣晚舉子叔本雖鍾愛而訓之則嚴其貞靜而明於大義若此壽六十九果髻年見邵朱二叔母合爨以居有無緩急相倚藉心事相告語吾母潘恭人以伯妯領袖其間一門驩如也時家道嚮隆殆猶歲之初春日之始旦也迨邵恭人從宦中外而吾母繼之朱安人獨家居侍養雖恩榮烜奕而情由勢格景象異矣夫家之昌莫不由於內助念先大夫伯仲並配賢媿上承大父母壽康是家慶之殷有出於崇爵厚積之外者矣果日與諸昆弟嬉游協氣中而莫知所以乃今得於存想爰述以詔後人

林太孺人傳

太孺人林氏贈大名府推官橘泉公配廣東僉憲君德母也太孺人寬和而靈慧初歸橘泉公以庶媳事嫡姑孝謹不以嫌隙失婦順橘泉公疏節近迂孺人佐以勤飭內外稱宜家焉子惟僉憲君一人雖甚鍾愛而能訓以義方僉憲君弱冠登第兩為郡節推孺人慮其年少震矜也時戒飭之嘉靖庚戌僉憲君在諫垣孺人就養果遠第獲侍京邸僉憲君夙以風節

自勵孺人每見草疏心虞其挑禍而義不欲沮之嘗私於果曰吾兒盡忠職也禍福惟天我獨且柰何及北虜內犯京宦甚戒嚴僉憲君奉

詔募兵山東果移就同寓朝夕聆慈訓沐存愛因以稔孺人之懿淑賢達有非竝幃之流所能幾及者僉憲君志行超卓功名著于春秋謂非母教之所致與孺人生弘治庚戌十月二十一日卒嘉靖庚申正月四日壽七十

一
論曰予觀古昔哲人名流其母率皆令淑若范孟博蘇子瞻尹彥明諸母可選也或謂人稟質受衷得於母者恒多其然耶吾族諸宦達母多賢予述而傳之豈以其子故飾辭哉蓋所謂信而有徵者以昭內則不亦偉乎

節婦葉安人傳

葉氏崇泮公配也葉為吾里儒族近以甲科顯安人歸崇泮公孀時年二十五無子而家貧甚舅欲其改適多方窘逼執不從拮据茹苦先大母張恭人及吾母潘恭人慰而恤之余垂髫時識安人蓋嘗顧先恭人見其端謹慤恪不妄言笑語次每泣下誓志貞守即詩書所稱無以加已嗣子窶

弱靡賴苦節五十餘年以壽終予會宗人奠之誄曰臣忠婦節天地正氣
為國為家綱常攸繫維婦苦節事尤不易安人早婺栢舟自擔艱辛備嘗
節操愈勵雖有繼子莫可倚藉念此玆玆可為流涕茲焉考終奉居合窀
會首九原庶幾無愧國有恤典尚光厥世臨觴一奠哀賢之義嗟乎筭幃
之流經史之訓不經於耳目而艱貞持節矢死靡忒謂非天植其性然哉
若葉安人則予所目覩者昔已傳之邑志今甲有旌典觀風者庶其采而
表焉

溫州府

樵雲翁傳

樵雲翁者王氏名毓字尹成溫之永嘉人嘗葬其

父珎矣而不忍去也廬其傍扁曰樵雲而公又好詩著槐陰集多與其社中人唱和社中人亦遂呼之曰樵雲公云自樵雲公之先世居永嘉之華

蓋鄉英橋里俱有隱德以壽考終四傳而至公公少侍其

父謹甚恒韋韞而治饗膳既成則衣冠而薦之隅晚竟餐霞器乃退不者

屏營不自容亦竟遜匕箸矣間小失

父意長跪謝過非強之起不起也而樵雲公善辨以其美規為子母之息

宛轉佐歲恒不乏公有七子環琛瑞璫由琛先後為起甲第相望公尤

好施予以軀赴人之急比隣火數千百家皆燼公指廩而予之俾稱力自

取給其他孤寡母論䟽戚以指計衣食視公若庫庾也公一言而取成者

奉以為節符母爽矣七子之子二十八之子九十四而始有以詩

書之業起者然猶用子孫顯曰封通政司右通政鉅南雄教授贈大理少

卿鍊訓導錫其人也九十四子之子二百六而益顯曰太僕寺丞清布政

司左叅議澈國子祭酒激鴻臚序班漢贈太僕寺丞沛教授洌贈大明推

官浥右僉都御史諍其人也二百六子之子三百五十而顯者曰推官良弼鴻臚序班良慶鴻臚署丞叔懋按察司副使叔果叔杲按察司僉事贈太僕少卿德光祿寺署丞叔本其人也三百五十子之子四百九十而取科名其類出且未艾也王氏固彬彬文學忠節政術著矣叔杲奉使者墮書治吳而以間過余曰英橋里蓋山海都會云其初磊珂不可道灌莽相屬自樵雲公為七第而各以其力自闢數里之內鱗次櫛比矣乃孰非筆路籃縷以啓山林哉即無論他姓而王醇為其族成大都矣日不較兄弟稱海警率宗城之幾與郡雄埒。

外史氏曰吾聞之崑崙涓涓流耳歷數百折而派分灌溉九州之大半抑何神也當樵雲公時而

高皇帝獨身杖一劍以掃制六合周之子孫其麗不億樵雲公茫然隱夫耳即其後亦遂彙發且世世服人主休采稱喬木者何居也造化之培栽有專德固大成大小成小哉

賜進士出身嘉議大夫南京大理寺卿吳郡王世貞撰

竹雪公傳

處士王君基字廷載號竹雪世居永嘉沙城英橋曾祖樂善公珍祖樵雲公毓皆隱德弗耀父夢竹公由有司舉為陰陽正術處士性孝友善施與襟度雅曠篤於恩義方弱冠正術公悉以家事畀之處士不私蓄置產倍先業家聚數百指而庭無異言正術公嘗曰吾久以家事累汝將資糶所置者還汝處士泣辭公乃焚香祝天願天福長子正術公或他出必衣冠危坐以待每值良辰兄弟宴集怡怡如也母徐無子病不能行君扶之數十年不懈於是鄉人悉稱處士孝弟居母喪以禮三年不解衰經父喪亦如之時有白燕巢幕衆咸謂孝感每旦率子弟謁家祠退則儼然端居手不釋卷所著有耕雲餘思藁東吳桑悅序于首章恭毅公扁其齋曰竹雪書舍且為文頌其清白郡守陸公禮為鄉飲賓時稱得人長洲文侯慎許可前後任甌守令遇處士如大賓凡疑獄悉屬處分人多翕服歲饑勸侯發廩賑餼賴以全活者衆嘗輸粟助邊郡邑奉朝例立石旌之平生交游多名公碩儒如章恭毅章樵山黃羅山趙東山輩皆道義交也鄉有貧

疾不能醫婚不能畢喪不能舉饑寒無賴者則為之延醫助奩具資棺槨給布粟俾各遂其願里中有爭詣處士求決得一言輒服以去其行誼乎人如此晚年童顏鶴髮曳杖屨徜徉山水間朋友相問不敢斥名則曰王竹雪云瓚不穀辱處士知愛數十年今忝從太史氏後嘉其行可為世範故撫取狀中大節及予聞見者著于傳俾有所考焉論曰程子有言一命之士苟存心於愛物於人必有所濟處士使霑一命其濟人當不止此而弗克小試以究厥施可惜也夫然王氏之嗣續蕃衍諸孫需用於時實基於是辟諸物必有初涵蓄深固然後乃際時暢達沛然而莫能禦也歟

正德十年乙亥冬日

賜進士及第翰林院編脩同脩 國史甌濱王瓚撰

中制公傳

公浙之永嘉人姓王氏名鏞字九韶王大姓望永嘉公父祖皆潛德弗耀至公又以醇行望王氏於其父母為能子於族姓為才父兄於鄉鄰為善人長者嘗以戶役誑誤代父受繫人有不勝其苦者公獨甘處之顧其心惟恐不釋禍以貽父憂既而竟釋得歸而家益落日求所以娛親意者夙

夜勤力不懈茹苦攻堅如是者數年家稍稍復振則推其餘以分贍其骨肉宗黨遠近䟽戚恩意曲備也母先喪事繼母如母諸弟皆側出幼少衣服飲食訓誨如子比長婚娶又分貲給之俾各能自立故諸弟終身不惟以兄事公事若父比其沒也語及必流涕性樂聞人之善而諱其惡人或

有紛競輒以理論解諄勤反覆必得其平乃止有不願之公府而願取決公一言者雖鄉之達官貴士亦歛衽敬服公不為巖絕詭異之行平心率物按依本分鄉人稱之曰中制先生因以為號焉

張岳曰中道之難成久矣言行孝弟近不出戶庭之間世之君子盖有能峙聲譽以駭動一時鮮克無恨於此者鄉閭質美之士行或暗合矣又以隱約莫能自見至若班班見前史獨行孝友諸篇要多一節殊異而非盡中行也是故不得中行而與自古難之矣若公之行事寧能使之無傳乎公子清以太僕丞致仕孫良弼廉州府推官與余同官述其祖父事如此乃為之傳云

嘉靖己亥春三月吉日

賜進士出身中憲大夫浙江提刑按察司提學副使前知廉州府惠安張岳謹

通政公傳

通政溪橋王公永嘉人也諱鉅字九思居邑之溪橋因以為號有子三人長福建叅議澈次國子祭酒激又次贈太僕寺丞沛孫五人叔懋鴻臚署丞叔程國子生叔果廣東按察副使叔杲蘇松兵備叅政叔本光祿署丞曾孫十一人光蘊舉于鄉光裕光祿光蕙光蔭光著光芾皆為郡邑博士弟子光祖光薦光普光美皆受業

天子之辟雍仕者能其官學者雄於文而兵憲君尤以治行著海內翕然稱望族然言德澤教範則必曰自公始公少年喪父能自樹立奉母孝撫諸弟成家規猷宏裕若素富貴者及既富貴乃更自斂飭屏迹鄉居日以孝謹約子孫及其宗人諸當道禮之特至公恂恂辭謝於鄉土利病所宜興革沉抑所不能伸者則毅然建白而一無所徇力能為者以身肩之性喜音樂有期功喪輒屏去客以謝安石事告愀然起曰吾不忍為也與人無貴賤為禮必均而愛甚周賑貧濟急疊疊無倦色而尤恆宗族徧脩其祖墓構墓廬又置田以供祀事前後費鉅未始斂其族人一錢嘗因二子仕於朝上書闕下言永嘉場竈戶折色之累詔均諸一邑竈戶賴以不

徙死故公之生也諸竈戶相與頌之卒也相與哭之葬也引柩而送之緋長數十尋不勝執已又相與建祠屋繪像祀之嗚呼此豈徒德公哉其行與事所以感之者素矣公曾祖毓祖珙父封世隱德弗耀配恭人張氏故少師文忠公女兄德壽媿公公以祭酒貴封通政司右通政卒於嘉靖丙申七月享年八十七計聞

世宗皇帝錄祭酒日講功 賜祭一壇其年十二月 賜葬于先域半山之原張恭人祔存齋子曰昔王祐手植三槐于庭曰吾子孫必有為三公者後卒如其言是豈漫期而偶中哉其培植積累者有素誠自知其必昌顯審也予聞王公始作室溪橋時貲力猶詘乃所規畫表置獨深廣高衍衆咸笑之已而室竟成及今八十年子孫之生其間者詩書簪紱相繩而日盛非公樹德韞善大其緒而昌其後孰能有此予與祭酒同舉進士尋督浙學政行部至東嘉東嘉人誦公賢因就訪於英橋故里周覽形勝其居右山左海襟帶澄湖為一方英靈所鍾聚云頃兵憲君伯仲緣族居築堡向予談其山川猶恍然在目堪輿家福地之說溪橋殆專之矣嗚呼維溪之源不濬而深公子孫世世引長之今之英橋不將邁昔之三槐哉

萬曆乙亥冬十月

賜進士及第光祿大夫柱國少師兼太子太師吏部尚書 建極殿大學士
華亭徐階撰

參議東厓翁傳

易曰天助順人助信故順則詒之多福信則傳之榮名猶揚桴樹臬然響影已臻矣然則善不得不福福不得不名而世迺多言陰德玄善何哉有以夫其欲廉取之而厚食之乎其取愈益廉者其食亦愈益遠矣

外史氏曰吾溫士大夫最盛者咸推永嘉場王氏王氏推厓翁其貴富長壽多男子賢而有文高朗而令終自諸福之物前世所不能兼者至翁咸有迺至父子兄弟累世相襲起家甲科又相禫為司馬部更出入本兵之署若其家術然聲施于塞外文武之績貽之無窮豈不亦偉哉非盛德其孰能當之薦紳先生既咸歆艷之則爭傳東厓先生行事著其所以然洋洋乎備矣余獨以先生顧尚有深博隱德世所不表者也以不襮故莫能名之其以緼福釀積不亦宜乎余則以暇日為之傳焉

傳曰東厓先生王氏諱澈字子明其先自台徙永嘉至先生八世矣父曰

溪橋翁隱君子也而有奇節達識身居約而恩澤乃蓋其一里里人以為歸歸然其若素封巨室也事具閩人王道思先生誌中溪橋翁凡三子先生其伯也自少好學能文為諸生試常冠與仲祭酒公鶴山先生齊名競爽稱二王焉母曰張太恭人少師張文忠公姊也少師公之生乃後先生二年其成進士也則先生次則祭酒公而先生之舉則癸酉也故一時甥舅昆弟出入相師友然少師公內獨愛先生悅安之莫與為比居久之少師公以議禮超遷五六歲間至閣老而先生選為禮部司務尋遷司馬郎仲亦以名進士入吏部相與同朝而閣老公獨內敬先生如故時所言常聽鄞人尚書張公所稱以忠信周旋扶植善類者蓋多有之先生以執政愛甥力足以躋膺躡要不碌碌然其徘徊郎署者十年乃始陞為福建叅議猶常調也是時二親並大耋優游在堂而先生適告歸日戲綵娛樂之因遂不赴而先生身所樹立地望種種甲于里中矣曩少師公之立朝蓋多震撼擊撞三已四召砥柱自命風濤日有然曾微濺沫以及先生顏然乎其間顧徃徃樹德焉非其仁智之驗然哉先生狀貌魁梧望之泰山喬嶽而器度駘蕩即之恢恢然也與人言輒傾肺腑不以知故逆人其間

入善也津津然色喜常有味乎其言之也至不善則慘沮怛傷之蒿目而已終不以出口其聞人急也毅然振郵之人有即之謀罔不竭忠以期于克濟以故無賢愚緩急隨深淺酌焉而無不得所欲而去者皆以先生當世鉅人長者也其諸措注尤鉅者贊築永嘉塲沙城以為瀕海屏蔽出粟平糶廣設糜粥日舖千人以救乙巳之饑皆較然著明在人口矣至如脩譜牒建宗祠著族約蘋藻孝鬼神行葦敦宗族匍匐救凶札不以身節嗇故儉其親不以菲廢禮者固先生庸行也先生之生成化癸巳其卒嘉靖辛亥凡七十有九年其所積德累善亦不可以縷數矣蓋夫人而能見之能言之其諸細行瑣善端人愿士可庶幾也彼其得天厚而引世長者亦將有陰隲以然其在郎署服官時乎夫曰忠信周旋扶植善類似矣亦言其大都爾往余蓋聞戚里有張皇親者云兄弟縱橫弘正時以

母后故弟嘗有殺人之辜吏不敢發至

先帝時發之吏奏當殊死而可矣顧

上意有所嚙震怒不測將致之族東朝動搖雖少師公不知其不可也先生銳意救之具言鞠凶酷戾不可不面諍狀少師公大悟以聞于

上久之事乃得解吏舉法而罷人咸以多張公察其本則先生也余嘗從少師仲子尚寶君見少師造膝之疏抵牾

上赫然霆震者數矣少師蓋不獨以去就爭迺以身也微是固當有數十百人磔夷者且國體其謂何哉推此則嘉靖丁亥甲午間諸臣有觸犯詔誤詔旨所欲殺已而減降者非先生之力而誰矣蓋少師公剛毅而明決有古大臣風乃其嚴不殘廉不剝車出而不假力於駢脅者以有先生在也秉鈞當國十數年所咨訊而生殺予奪者不可勝數先生以其仁厚居間辨陶公之璧舍中山之麀固浸淫徧于海內矣然則先生之業乃上與少師公而修廣也夫守職郎署而功載寰宇尋聲循跡則不尸其有兩集凍釋草木萌起雲無處所茲非所謂陰德玄善者耶其與屏一蛇活一雀者功相萬也析圭寢丘授環累世又足言乎

論曰深乎厓翁先生之有德于天下也以與少師公俱雖然輔之善先之食何哉無亦天有所分予而先生則謙受之乎是故位不滿滿于祿名不引引于壽身不遂遂于子孫固其理也世多以先生素富貴而常衣麤食淡又治生不欲屑越其財與彼信陵北海食客者異余獨以先生蓋知消

息之理者其苦身居約不欲洗腆以明得意固將大有所遺也昔有筮王氏者以淮水在亡今以先生之德子孫修之雖以帶甌江礪華山孰云不可乎

隆慶己巳長至後五日

賜進士出身中奉大夫前江西布政使司左布政使通家姪後學侯一元譔

參議公傳

溫郡永嘉華蓋鄉有大姓王氏者於鈴為同宗族弟職方君叔果為鄉舉同年前後同上于春官占仕籍投意氣者又若干人焉咸蔚然博雅君子云因得講于其世間參議公之賢嘆慕之往歲壬子自閩徑東甌不幸哭參議公于柩前越凡三載職方君自京師為書持四明張尚書所為參議公墓誌銘寄鈴於斥丘屬為傳鈴謝不敏既而官留都職方君書來趣前事至再時東甌士人遊南中者咸稱參議公宜有傳噫公誠宜柰獨慚予何雖然愿附草創貽之當世太史庶幾芟其蕪採其實乎

傳曰參議公王氏諱澈字子明別號東厓其先萬十一府君諱惠徙自吾黃巖之寧溪世居永嘉英橋里四傳至樵雲翁諱毓族始大七傳至溪橋

翁諱鉅遂以行誼超卓尸祝于鄉配張氏少師文忠公女兄實多生聞人
其一為公次為國子祭酒激次為贈太僕寺丞沛公生而穎異少而嗜學
昆弟舅甥相師友並奮藝林先後成科第嘉靖初選授禮部司務歷遷兵
部車駕員外郎武庫郎中于時文忠公獨秉鈞衡仲氏繼登華要公退然
自抑不翕熱徃徃陰扶善類佐文忠公以道而不自以為功入官僅十年
嘗念一門戚屬過盛而二親垂耄在堂缺朝夕侍養輒慨焉有投簪想會
喪潘宜人得請歸尋拜福建叅議之命不赴暨連遭大艱服闋懇疏乞
休遂終老故里中世士大夫罷宦徃徃蹕弛不復顧名行甚者張餘焰陵
躒鄉族攫效之以為常間有能自足于一丘一壑與齊民相安無事則已
嘖嘖稱賢公棲遲桑梓幾二十年平居不惟安分守己不奸於物而孳孳
焉日惟博行履道陳常樹聲推羸振乏為事若將舉其宗族鄉黨人人納
諸士君子之域而脫其饑寒困窮之累者今試傳其大者公惟人生不可
不尊祖自周太宰九兩立宗之法廢人遂不知其身之所從來族散久矣
乃酌先儒義起之制於始祖萬十一府君墓右特建宗祠其制中堂腋廳
旁廡外門又外為石坊其堂之上下寬廣可容千人其費踰千金皆公之

自出亦難矣。祠成時，英橋子姓以千計，公每歲立春，率以祭。三時率以薦，朔望率以謁，祭畢率以餽，儀節以莅之，誠敬以孚之，歡愛以洽之，衣冠雲集，咸雍雍肅肅焉。公乃颺言曰：「凡我子姓聚于斯堂，同奉府君者，凡以吾身之所同出也。今以同出之身而相視如塗人，然可乎？則何以對越吾祖矣？」公時一言而人人動容傾耳焉。公乃諭于衆，作族約，立約正，司訟，司糾，擇其族之賢且才者為之，有事則司訟，司糾告于約正，朔望禮畢，約正會族衆，遵族約以聽之。行之數年，英橋之族遂以太和時郡守洪公垣留意教化，聞王氏之族不煩官而理也。取公族約頒之，闔郡四鄉大族多因興起者，及公沒，公諸子奉約惟謹。至于今，不廢。公於郡邑，恥事請謁，惟關鄉土利害，則攘臂公言之。永嘉場瀕海，故有沙城衛鹵地，歲久風濤蕩蝕，殆盡。溪橋翁嘗議堤以石，䟽于朝事，下所司格不行。公繼先志，力請於當道。當道以公言理，前役顧衆難於慮，始賴公勸相周旋，以卒底于成。鄉民迄今誦其功。歲乙巳，郡大饑，富家咸騰穀，值牟大利，公獨減價以糶。既復，嘆曰：「減價非不利，無錢之家張口待哺者，獨非鄉人耶？吾安所利之？」乃命二子移粟宗祠作粥糜，其法先期戒僕役，預器用，日哺時作粥，達旦具及。

晨鳴鼓召餓者至則扃大門。鱗次趺坐堂廡間。婦女幼稚別為區。坐定以次頒粥。食罷鳴鼓出。續至者用印臂為號。俾弗溷焉。午訖事少。選滌器。舂米注水。聚薪及晡。又作粥。如是者凡兩月。諸奉命調度者旦夕勤劇。不敢問他事。凡公所施必使人受實惠。此法不知當時所存活幾百千人。視昔官府出公帑屬里役。苟且將事散之。無度或令過飽。或後至擁格不得食。往往僵死。名為救饑。實反殺之者。公誠得法。足著為令。公生世凡七十有九年。中間家食久。父子兩世濟美。咸以淳心篤行表儀宗族。嘉惠鄉民。而公又文之以禮樂焉。故存則相與尊之。德之沒則相與哀之。思之若不可一日無公。父子者公生二男子。長即職方君叔果。次進士君叔杲。咸競爽足昌其世云。

論曰昔漢貢禹有言。居官而致富者為雄傑。處家而得利者為豪雋。噫俗敝久矣。嘗試論之。夫務致富者必剝其民。務得利者必陵其鄉。未有進剝其民退而能施者也。未有處陵其鄉進而能廉者也。雄傑豪雋之名。乃歸之貪婪無恥者乎。夫叅議公者。當其振纓天衢。徊翔郎署。跡犯親故之嫌。位乏民崑之寄。未有以異於人也。及退而家食。修仁義之道。崇禮讓之風。

以聯屬其宗族鄉黨又何其揭揭然使由是進當導民阜俗之任或專都
邑或鎮方岳為國家承流宣化將必有豐功永業覆蓋元元古來所稱良
牧伯公曷讓之嗟乎阡陌飛埃雨施於山函牛之鼎以熟燕雀君子傷焉
抑公辭榮耽寂之心勝將留其身之所不及遺之子若孫乎公生平細大
族弟僉憲君有狀四明張尚書擴撫為銘鈴未之悉述惟撮其建宗祠行
族約施荒粥者詳著于篇俾世之休居士大夫讀之不惟能令蹕弛陵蹶
者因之羞顏入地而彼自足於一丘一壑於宗族鄉黨焉能為有無者聞
公之風有不翻然自失蹶然下拜者乎

嘉靖庚申仲秋之吉

賜進士第奉訓大夫南京工部營繕清吏司郎中宗姪鈴譔

僉憲東華公傳

王大夫名德字汝脩永嘉人也讀書郡華蓋山之東故稱東華云父橘泉
公浥偉人長者蓋君生十二年而能文讀范希文傳請橘泉公曰兒他日
當為此人橘泉公頷竒之因為聚書悉延名士與共學諸所措注家為之
傾迺余則聞橘泉公始無子也祈章于天夜夢神自天降抱兒與橘泉公

衣之祭酒公之衣曰以為爾子命之名曰王德已而大夫生即以名之蓋
橘泉公是時業心竒之矣後為教子傾其貲則人又莫不竊嘆之者橘泉
公自若也年十五為諸生李知縣者竒之拔之前列人猶未知君無何則
君試連捷遂以嘉靖戊戌舉進士時年二十二矣君伯祖少司寇公薦君
於李相國使召君君不往君伯父叅議公又自家遺書吏部薦君君疑之
啓視果然即削去其弱年卓立類是也其為山東東昌推官最受知巡撫
曾公曾公天下才士然內敬君稱為先生不以部吏遇也嘗署高唐建議
開北門便民汲甫鑿地得石丈餘有文曰北門開王德來見者莫不異之
蓋君未生而姓名夢橘泉君著石文其所自來固久遠矣數折疑獄有市
人攫人金而匿弗承者君使人以其衣往試探其孛立得苞苴斷絕嘗以
暑月憇驛亭中有饋君扇者不可卻則梁懸之而去迎橘泉公養官舍中
已而公卒君扶櫬歸哀痛殆不勝喪因執禮茹哀不言弔賓至徃徃怪之
籍藁于地不肯起遂患土瘡幾危僅而得愈服除久之起為大名推官河
南有盜劫中使事聞上怒甚或以誣滑人連逮甚急君察其有冤執弗
予河南部中大吏至君與相持竟活滑人滑人德之為生祠肖像祠焉為

理僅一歲所政績燁然事具大名新志名宦中志所載名宦大率以蓋棺事定而君獨身存而志者信君也歲在戊申君以秩滿至京時閣老徐公冢宰聞公大中丞屠公咸敬重君會選臺諫諸公為君虛席而君顧引嫌却避久之迺始肯會擢授戶科給事中載浹日即上疏請簡內閣輔臣語至峻切讀者動色然君亦坐是見疏不容矣按行光祿寺搜革上供冗費抗疏悉挂中貴勲戚子弟窟穴是中者數十人費頓減過半庚戌秋虜大入薄都城上為宵旰君憤激條上十事中使夜至君家傳旨悉報可之一時倚以為重奉命募兵山東以便宜激厲壯士士雲集踰躍應募蓋人可用而君雅素峻潔當是時又以軍興呵責土臣自兩司大吏莫不俯首惕息聽君者而君以是亦得嚴名有 詔下公卿求異才制虜君為舉首且大用而君出為嶺南兵備僉事矣君之在諫垣凡上四十餘疏率持大體而友人鄭生者則謂余曰君嘗病困邱舍中生為視藥摩足於君卧內得封事草數萬言大旨如劉向京房語至指擿激烈絕痛不可聞君謂鄭生勿泄也吾病已將上之生曰君欲死闕下耶柰君老母何為引燭焚之今問其家草故在而君亦遂不復上者蓋以母也常自以

天子近侍主彈擊封駁每持先朝故事不肯為公卿大臣誣而大臣亦持先
輩者宿以小禮望君或言君之出頗由李尚書則賢者而猶有不悅也其
為嶺南兵備勒兵擊斬寇賊徭獍破降其二十餘寨用衣冠悉羈縻其酋
莫敢携貳嶺表為清其用兵按軍法手斬隊長不用命者兵士股慄以故
所向有功而旁視者徃徃駭之皆以君破格也無何英德有盜庫賊君掩
捕得之盜則反執君兵而有司憚君之嚴即相與織君於都御史以君護
兵而苛民也君慨然曰吾不憚受謗獨如兵數十人寃而死何遂乞休拜
疏即行疏下吏部吏部惜君移文都御史留之而君業已去其官而歸矣
居久之竟坐擅離法廢于家杜門謝事然余間詣君君抵掌談事又未嘗
不烈烈動于中也余固以窺君其有意於當世倭寇連歲劫海上且至君
君鳩其族人鄉里為義兵率以禦賊歲有斬馘士益厲君亦益自憙蓋丙
辰丁巳兩歲間君之軍鋒鏘鏘有聲而所居永嘉塲遂屹然為郡巨障明
年戊午賊益兵大至數十倍於前則君兵力益寡於是賊殺君從父沛君
悲憤益奮擊賊稍稍却矣然賊恃眾直薄郡城官軍辟易莫敢撻者君獨
以孤兵轉鬪還趨至金輿賊伏遮道起圍君不得脫遂死之是歲四月二

十日也享年僅四十二事聞 詔贈君太僕少卿立祠祀焉而官其子世襲錦衣百戶以軍功報之禮也始橘泉公以祭酒夢君也余每擬之宦業所至而君顧久不進及今贈官其品同而皆為京堂卒如其兆云君為人英敏矜廉多大節頗負氣不為人下其居官持廉尤甚兩仕為理皆著氷蘖比為給舍四方饋遺者莫敢闖其門風節凜然無與為比其在嶺南都御史賢君盛移檄獎之而餉以金曰吾俸也君引大體曰夫都御史於兩司有刺舉耳有司以下則有獎勸獎勸以金吾兩司也而受金則下與有司為曹不可即以金付箴吏登之籍然君去廣後人踵故事則往往以金獎兩司兩司得之亦喜率受莫辭者矣君在山東時趙尚書某者時為知州坐法君薄其為人持之甚堅趙怨深次骨會君承父諱歸則遂決岡高翔至尚書尊寵赫然為君勍敵然竟敗去海內有識蓋顛顛望君而君則死矣悲夫君之子二長如珪狀貌性度才美酷似君即之則栗而潤次璧尚幼

論曰王大夫之死烈矣或迺曰烈士殉名自憑生者視之則賢耳若儒者則甚重其死細其名又曰大夫曩者欲死諫不死以母也今顧死盜賊遺

哀老母何哉且封人死封將死綏職耳大夫以祝代庖薦其鸞刀以血其指惜矣念菴羅先生曰大夫之死蓋傷庖人之不治庖也雖微母猶死之故曰志士嗟乎羅先生之云則近之矣夫君臣之義無所逃於天地之間大夫雖放固

天子之外臣也四郊多壘越甲日鳴忠臣之心能勿憤乎昔者段司農以卿屏居廼奪笏擊賊馬伏波老不用即據鞍請試事有成不成然未有非之者也今王大夫何以異此蓋狼曠廢為右而馳秦師廼其所以君子矣或曰王大夫兵敗不免耳死固非其志良然夫王大夫之志廼欲掀揭宇宙先憂後樂如范希文也即一戰滅賊猶不塞其志肯死之乎憶往與大夫同卧大夫旦謂余曰吾夜夢仰視天宇遍為大字字皆為君名君必他日樹功業于天下勉之哉余謝不敢則大夫又責余曰夫宇宙內事非吾輩事耶而讓何也今君讓有以知君之不能余又愧謝廼已嗚呼斯誠大夫之志爾廼一日邂逅而死則君之不幸也而亦足以明人臣之義令棄甲跳身者汗赤無所施其顏也武穆有言文官不愛錢武官不惜死天下太平矣惟大夫兼之以厲世風脩太平雖死不亦可乎

嘉靖己未仲冬朔日同郡三谷山人侯一元撰

誌銘

樂善翁墓誌

處士姓王氏諱珎字伯玘其先世五代唐晉間自閩徙居永嘉之英橋里曾大父諱辰大父諱惠父諱仕宜母吳氏處士端謹諒直自幼時已岐嶷不逐兒戲父性嚴毅事之曲盡必得其歡心與人交久而益虔至聞善則若自己出惟恐有不及也治家儉而有節家日裕尤喜行陰德事所過橋梁堰道有傾塌不便於民與妨農害稼者捐貲繕治不計工力多寡必期完固方泐陡門地衝而善潰先是郡邑修築役非其人費鉅無成績處士獻議任事踰月即告成闢家塾延師教子弟時往觀省凡古人善可為法惡可為戒者率使之成誦從而論其大旨開諭之故其子孫皆恂恂以孝友稱平生少疾病年既耄而耳目聰明遇賓客則觴咏談笑愉愉如也嘗曰我於世無他好所樂者獨有善耳因自號樂善處士娶胡氏有淑德克相家政先三十年卒葬祔祖塋之側繼室吳氏子男一毓胡氏出也孫男七環琛瑀珙璩由瑛琛早卒瑀邑庠生女四處士生於元元統二年甲戌十一月十三日卒於我明永樂二十年壬寅六月八日享年八十有九

以卒之又明年甲辰十二月十九日葬於膺符鄉半山先期其子毓奉狀請誌其墓其孫瑀從予學故不辭而為書其行實如左嗚呼處士於事親理家御衆酬物咸出於理義而無矯俗干名之心使有一命之寄以攄其蘊當不止此已也其永矢弗遇終老林泉詎非命耶然躋上壽享富饒子孫之盛泯泯然是福善之報既福其身裕其家而又昌其後也歟後之人過其墓而指曰此樂善處士阡也見其所修橋梁堰道而指曰此樂善處士蹟也斯其銘百世不泯較之得志一時而無聞於後者其得失相去遠矣

永樂二十二年甲辰秋八月

將仕佐郎常州府儒學教授邑人金原祺撰

樵雲翁墓誌銘

友人王秉圭以宣德戊申十一月葬其父樵雲處士邑之膺符鄉半山祖塋之原先期奉狀以墓銘為請予與處士有文會之雅而其季子瑀又有同門之舊誼不可辭按狀處士諱毓字尹成號樵雲世居永嘉沙城之英橋里曾祖惠祖仕宜父珎母胡氏處士性明敏慈惠好讀書不喜佛老學

於禮義事勇為力行率以剛直任之遇暴妄者雖主于嚴正而從容開諭
又多示以恩意故聞處士令譽及見其表儀必改容起敬從而悔化者有
之家饒裕尤好周恤族里間老而孤嫠者貧窶者生有給死有賻婚嫁有
資里嘗失火一望為墟輒指廬賑之賴聚活者數十家其陰德事固多而
大率類如此結廬於先人墓下其言曰我父葬於是我其廬於是乎當屏
人間事付諸子從而樵採於雲中焉乃扁其廬曰樵雲人因稱之曰樵雲
處士性不善酒每對景有文字會必痛飲賦詩劇談為樂所著詩曰槐陰
吟集樂府曰蛙鳴鼓吹錄配謝氏側室楊氏子男七長環即秉圭次琛先
卒次瑤邑庠生次珙次璩謝出次由楊出其七城庶出女一適御史鄭公
道寧子璣處士壽六十有七蓋生於元至正庚子十月十五日卒於我
明宣德丙午八月十六日也時聞者自姻戚至於里之耆老童子罔不嗟泣
至有仰天嘔慟經信宿而不已者嗚呼處士感人之深至於是乎是碑之
在人口銘之在人心其事信其論定真沒世不忘也不愈於得志而無稱
者乎然以之傳於將來則伐石琢辭又惡能已耶是為銘銘曰
厥德允臧厥才孔良不耀其鎡而所澤則訪今也云亡爰宅茲岡宜爾子

孫茂且昌

宣德四年己酉春二月既望

徵仕郎刑科給事中邑人方祖元撰

王母謝氏安人墓誌銘

沙城樵雲王公尹成予昔從侍笑語矣遂與其震器秉圭諸昆季相友善公三子秉桓與予同受經于邑庠因知其家世行事之詳尋而公之六子由室予女姪而予子璣又室公女交為姻婭於是又知樵雲公安人間行之良安人以壽終其子將襄事乞文誌其墓予念始忝交好繼辱姻戚誼不可辭遂誌之

安人謝氏世士族祖諱剛父諱昇母王氏生安人於元至正辛丑正月九日父母以生年錫名諱辛丑行德一安人柔順恭儉自少善相母氏宜中饋自歸樵雲克脩婦道供祀事奉庭闈咸盡禮節樵雲有高志而才識超卓於家政又不屑瑣瑣而安人能綜理之無遺是以樵雲得玩心詩書恣力吟咏終焉者皆內贊之功也性好施予聞有匱乏困厄者必惻然周之教子女有禮耄年子婦皆班白孫曾列侍承其志於一堂之上怡怡如也

卒於我 明正統戊辰十一月四日壽八十有八子男七長環即秉圭次
琛次瑀即秉桓次珙次璩次由次瑛女一即予子所室者孫男二十埏坦
暨壯在塏壇境封佳墀坡塔屋基壇陸墳填陞孫女九張炯陳曇朱齊曾
甫邵浦季旭皆壻也曾孫男十四鑾縱鎔鏞鈇鋃銀釧欽鈺銀鏤釧曾
孫女七長適陳玖餘幼嗚呼以安人之德宜其膺福祉享壽考家道蕃昌
矣今以卒之明年己巳十一月九日合葬膺符鄉半山先塋之次予為銘
其幽扁銘曰

維德之柔維善之脩維家之優維慶之悠維芳枝之稠樂哉斯丘千百斯
春秋

正統十四年己巳冬十二月既望

文林郎廣東道監察御史姻人鄭道寧撰

望雲王處士墓誌銘

宣德癸丑秋閏八月二十八日望雲王處士卒於沙城里第明年甲寅冬
十一月十七日葬于先塋之側其子民先事詣予奉所自撰幽堂誌泣請
墓銘予謂發潛德光垂不朽孝子之至情也固陋無文且與若翁未有雅

素行實不得詳也何敢銘則又泣而言曰痛惟吾父生而與先生雖未奉
良覲然鄰封相望願見之心旦夕不忘茲墓碣有待不肖孤不敢他求者
從先志也矧民所居恒心齋又嘗辱先生為記稱揚微眇皆推本陰德於
先人是則知吾父者莫先生若也敢固以請予媿其言遂不辭而誌曰處
士姓王氏諱全字允生為永嘉人曾祖惠祖仕宜父安宗母吳氏生元至
正甲辰十一月十七日壽七十娶葉氏子一民也孫男四女四處士善治
生尚儉約不規小利見義必為教導其子嚴甚或謂爾一子當愛之處士
曰教之以義方導之以善行非愛而何言者嘆服永樂甲辰歲浣饑慮里
中積粟不足以助不給特出私帑遠糴以繼鄰里至今懷其惠焉生平持
論切直臧否無少假借故鄉人之善不善者言議雖有不同而未嘗不心
服也處士性至孝葬二親於鄉之厚碧橫山廬于墓所額其堂曰存著晚
厭喧雜又結菴堂側顏曰望雲以示不忘時人因為號焉嗚呼世有苦心
焦思鯁鯁焉終身莫能自樹而處士之克亢厥宗興創滋殖好德考終如
此其所得于天者厚矣斯可銘也乃撫所聞序其世次因系之銘曰
遺之滿羸教之一經孰如陰德之冥冥守之有恒用之豐亨猗歟餘慶之

是承匪石斯貞匪文斯銘勗哉嗣人貽令名流芳委祉孫與曾

宣德九年甲寅冬十月朔旦郡人環菴虞原璩撰

自足翁暨配林安人合葬墓誌銘

自足翁隱君子也嘗治壽藏於先塋之次堪輿家欲以符鎮翁書曰人生百歲七十者稀夫妻偕老同葬為期翁後壽七十三其生為洪武甲子四月十八日卒為景泰丙子十月一日也安人壽七十二其生為洪武丙寅七月四日卒為天順丁丑七月二十二日也是年十月十九日同窆事固偶然翁之見亦云達哉墓在膺符鄉半山其子請誌銘按狀有可書者遂書之翁王氏永嘉英橋人曾祖仕宜祖珎父毓母謝氏翁諱環字秉珪行一號自足少承庭訓習詩禮事祖父母盡孝養家祠拜謁晨夕不廢防護先壟謹甚友愛諸弟會敘必歡仲弟早逝厚撫其孤教之所居室嘗書于柱曰愛惜子孫休利己聽遵祖父莫妨人又嘗諭子輩曰爾祖有訓人來告儼其事急矣不可迂緩凡此皆其行之修于家庭可書者族屬枝派有遠近遇之如一而尤恤孤獨贍貧窘死不能葬者葬之鄉人寒餒者衣之食之無棺殮者為棺殮之所經橋道宜修整者費出于己無靳也長里賦

立規約遺後有匿產詭戶者鳴于官司凡此皆其行之孚于族黨可書者
生平胸次脫洒年未艾即謝家政課子孫誦讀放情風月無不自得也少
保黃文簡公嘗偕友人虞環菴來訪賦三檜堂詩為翁壽正統辛酉應
詔輸粟郡預備倉有司立石旌其義甲戌輸粟助邊儲恩授七品散官而
翁素簡澹惟韋布是便郡邑禮以鄉賓辭不赴終身無疾忽伏枕竟謝醫
藥迨垂盡諸子請遺事乃言曰但存方寸地更無他言既卒田里間多有
涕泣者凡此皆可書也配安人林氏諱桂黃石里右族曾祖勝元杭學諭
祖苗父佑母祝氏安人性柔敏早孤母嘗授以孝經小學識其大義既歸
處庭闈族里咸得內則其逮下無妒心尤其性然也子男六埏坦在境安
人出佳陸及女庶出孫男八鏞鏞鈇鏗鏘鏗鏘鏘鏘鏘孫女九於乎若翁與
安人以德媿德而生順死哀亦可謂無憾矣為之銘曰
敦敘乎天倫順率乎天真澹乎自足兮葛天之民伊述令人年齊德鈞同
歸乎如堂之窀維大羅之嶙峋降宅龍神祚爾胤其振振
天順元年丁丑冬十一月既望邑人劉翼譔

吾王氏始祖萬十一府君諱惠二傳肅一翁諱仕宜三傳樂善翁諱珎四傳樵雲翁諱毓世德累仁崇業亢宗樵雲翁配安人謝氏有子七人四為我曾祖平五府君諱珙字秉信孝友天至篤仁義能急人之難量恢恢有容有以橫逆加者置弗較其行事長厚迄今人多頌之生洪武壬申七月一日卒景泰辛未五月二十二日壽六十配安人宋氏先卒卜葬于半山四龍左原府君宅兆則祔祖隴之右卒後九十九年為嘉靖己酉冬十月澈二子叔果叔杲因堪輿家言啓府君壙遷宋安人合葬視舊歲高數武先大父時齋翁大母上壽周安人從次祔焉府君六子長瑾次諱封為時齋翁三坡四厓五墳六陞孫為澈考諱鉦以仲弟祭酒澈貴封通政司右通政暨釗銛鉞鑰鉉鑣鉅鉅銅鉅鉞鉞銅鉅鉞鉞十五人曾孫三十二人玄孫六十人追惟府君歛德韞善而慶澤陰施啓我先通政及澈兄弟榮膺朝命嗣子輩仍叨科名里中長老言昔有貌府君者謂必有後而行誼為世所談說且曰天之報善不爽若此然則吾子孫所以世其家者孰非府君所垂裕哉夫潛積濬發未闡且湮澈竊懼焉爰述梗槩以詔來裔若樹旂勒頌永昭先休則有待於名作也

嘉靖二十九年庚戌冬十月既望

朝列大夫福建布政使司左叅議曾孫澈百拜撰

7 恪菴王公墓誌銘

恪菴王公以天順辛巳十二月二十一日卒距生洪武丁卯十月二十
日壽七十五又明年癸未冬十二月其子襄大事于鄉之厚碧嶽鍾橋山
先兆之次先期奉狀請銘其墓按狀公諱民字秉彝恪菴其號也世居永
嘉沙城之英橋曾祖仕宜祖安宗父全母葉氏公性孝義奉先嚴祀事躬
祠堂朔望展謁如禮事親怡婉旦夕定省謹甚母老壽康公亦白首寢食
微違憂形于色太常少卿黃公養正書怡親二字表其堂喪葬祭祀致哀
盡禮鄉族稱其孝焉正統己丑詔命郡邑立預備倉公獻穀六百石名
列少保黃公義倉記碑陰己巳括寇竊發將士討捕明年景泰庚午都御
史軒公董其事屬御史陳公擣師公捐百金助之癸酉朝命有能實京
儲者賜旌表有差郡邑等公名以上列報當獻米四百石以聞公念母
老年不能離左右長子良方總鹽賦屬次子塏漕米輸京庾因拜冠服之
錫兼門閭之表天順己卯有司奉詔諭義民輸穀以益預備公上粟四

百石郡復立石于庭旌之凡歲歟穀息增湧公則如常其他濟饑寒施棺
斂修橋道則未嘗靳也教子弟尊禮師儒雅好文辭黃少保公嘗偕虞環
菴先生過訪見其居室曰恒心齋亟加矜賞環菴記之搢紳序贈多矣公
動止有度語言有章勤儉潔素不尚華侈自少時父產已盛家事為劇獨
幹蠱益大振是皆可書者先後凡四娶子男七今存者六女六今存者五
潘氏生男溫幼亡今長子良次塏吳氏出三壘四塊五圮許氏出六壚顏
氏出孫男八蔡楠標校楫來扶秧柝女六嗚呼公光厥祖遺厥後視泯焉
無聞者不同矣斯可銘也乃銘曰

人有百行孝為之先人有恒性義制于天孝孚所親義推所積公履其全
令聞無斁考終永歸樂哉斯丘先塏攸祔百世松楸

天順七年癸未秋八月

賜進士第通奉大夫廣東布政使司左布政使邑人阮存謨

將仕佐郎夢竹王公墓誌銘

成化十九年癸卯冬十月將仕佐郎永嘉夢竹王公卒于家其子廷載以
卒之明年十月奉窆于膺符鄉半山祖隴述公狀以墓銘請應也不腆之

辭其何敢銘雖然有不可辭者先君恭毅公景泰中以儀制郎中言易儲
事下詔獄親交無敢通問夢竹公適來京邸與先君無面識迺顧存餽遺
經紀其家畧無顧慮謂家人曰汝盡心供饋吾異日與田五畝酬汝之勞
時應方垂髻公不鄙其穉愚所以期許之者甚至嗚呼利害死生之際骨
肉反眼而況他人公於是賢於人遠矣先公出獄為禮部侍郎高其義特
為傳屢書問訊歸田後一再過訪其見重如此惟是薄劣無以報德茲幸
得屬辭墓碣其又何辭公諱壑改由字秉璠別號夢竹其先自閩赤岸徙
永嘉之沙城英橋曾祖諱仕宜祖諱珎考諱毓俱隱德不仕公生而穎異
天性孝友在童孺已如成人初從學金紀善長從劉容直質問大義兼通
陰陽曆數醫卜諸書下西洋軍擾鄉民公年十五往白軍帥立禁止弱冠
長里賦出納量平貧困者貸之宣德中瑞平逃軍周文輩七十四人匿稅
戶家事覺當連坐官司檄君理之君令逃者自首匿萬里林中免連逮之
患寓主陳象謝以百金不受正統中永嘉場官王整妻劉氏誣狀里人張
希俊等十八人劫其家貲郡守劉公鞫問獄成公察其誣挺身詣府抗論
守悟始議別捕果得真犯而釋希俊等鹽司攢典彭廷震齋檄攝竈戶王

孝適孝與鄰鬪死其家誣廷震逮至官竟誣伏御史康公按審將決公懇
其寃於縣轉白得不死鄉有大癘雖至親亦屏跡公日往眎給以薪米衆
咸重其行誼郡守王公前令叅議周公舉為陰陽正術陳言軍民利病八
事多所施行嘗持府檄之瑞安募富民出粟賑饑注數過多衆患之公半
減其數富民張廷夫餽金不受置之而去踰年見而還之封識如故譙樓
刻漏壺久毀捐貲倡衆鑄成捨田十畝入官為香燭費任職凡九載有司
待以優禮年六十屏跡家居日行善事脩宗譜立家規教子孫惇睦建小
宗祠於正寢之東以奉考妣每旦肅揖遇忌辰甚哀性好施予族里師友
死無以斂者贈之喪不能舉者葬之世俗事巫鬼弗為也公長身偉貌氣
宇高邁所交游多賢士大夫工於詩所著有效顰集生于永樂丙戌四月
丙子卒年七十八配鄭氏先卒繼配徐氏鄭氏側室汪氏子四人長曰基
即廷載輸粟助邊立石旌異次曰塾曰壑曰堪女二人長適訓導楓林徐
守彝次適同里項淵孫男四錡鐵鐸鏞孫女四銘曰
利猶膏梁有弗嗜也規負矩方不是肆也跬步八荒均一眎也成敗臧否
若數計也於古或無於斯備也賢哲其徒匪今士也銘而勒諸可千禩也

成化二十年甲辰八月既望

賜進士出身徵仕郎南京禮科給事中郡人章玄應撰

貞菴王公墓誌銘

永嘉貞菴王君未卒時嘗應詔輸米備賑卒後郡邑循例立石表之因以義士稱焉茲其子治葬持狀請銘墓按狀貞菴諱挺字廷方貞菴其別號也生于永樂庚寅正月十六日卒于成化丙戌閏三月七日墓在膺符鄉半山先隴之側曾祖珎祖毓父環母林氏配陳氏閩福寧州學正啓之女貳室林氏側室單氏黃氏配生女居長生男曰鈇林氏生男曰鎬年長于鈇黃氏生男曰鐸單氏生女最幼也長壻同鄉陳玖次寧城百戶徐正貞菴自少明敏英果長就外傳即能自立祖父以產盛嘗長里賦君應役善事承其舊析貲產而日致增積父卒時諸弟婚媾未議也及弟長悉以已貲成之葬父治封塋崇廣作亭其上名曰永思天順戊寅郡守周侯命充耆彥處事決訟咸中情理成化丙戌得疾聞朝例令民間輸米備賑仍加表異乃囑弟及其子曰爾當圖之以遂吾志維時郡邑致書請之而貞菴卒矣更以弟在名聞弟辭乃復貞菴名而米則弟輸也郡邑立石表

之所居之東有田千餘畝四旁皆水耕者不便往來疾臻之際命工伐石
欲於東西築橋扶疾董工西橋甫建而君竟不起嗚呼若貞菴者殆欲有
施於鄉者也墓宜銘之銘曰
維天降衷民秉厥衷維皇錫極民歸其極秉衷歸極維爾考終貞珉表之
百世永譽維爾子孫其昌裕

成化三年丁亥春三月

賜進士第中憲大夫都察院左僉都御史致仕黃巖李匡謨

守約公墓誌銘

公諱塏字廷爽世居沙城英橋里曾祖樂靜翁安宗祖望雲翁子全代以
善德高貲樹鄉望考恪菴翁民敦德尚義 詔旌其門母吳安人於洪熙
乙巳七月二十一日生公公凝重孝友少嗜學以厄於病不克肆力恪菴
翁歲延塾賓訓飭諸兄弟公執子弟禮朝夕問難靡倦景泰間

朝命募人輸粟京庾恪菴翁首倡義以母葉安人高壽不可離左右公請代
行漕粟上京師領官告歸為父榮先君太常少卿以載與翰林侍講左春
坊周公中規時官京都咸為文贈之其居父喪戚甚敬事伯兄友諸弟以

惇睦稱於鄉黨而志行固執常以禮法繩飭因自號守約雖動作迂緩未
免為時所憚然久交者則知其心無偽也平居時手書自適遇契意處則
擊節以喜教子弟勤學必循規約遇姻族困疾捐衣粟辨醫藥濟之不靳
郡邑察其行起之為鄉者伸枉抑強衆多賢之尋退居以家政委諸子曰
塵世草露耳碌碌何為念伯兄居吳田遂營別墅鄰兄居將同樂永年也
無何邁疾而卒壽五十九鄉人誦其德厚以為歎所享云配滄湖張氏賢
淑得婦道先公卒子三校楫杖繼配下仙張氏生子棐側室張氏生子榛
女二長適五都邵棟次適鹹田張隆孫男一任嗚呼公雅行無愆生長富
逸而能守之以約可謂知所趨矣惜年不稱德天之所以昌其後者有在
乎為之銘曰

維慶之恒言行可徵維守之約紛華其削維其振振為鄉吉人彼壽之不
遐孰訊彼旻黃山峩峩靈秀蟠蓄維埋其玉維後人是淑

成化二十二年乙巳春二月

中書舍人直文淵閣同脩國史同邑黃璨撰

鑑水王先生偕配季氏安人合墓誌銘

先是弘治甲寅十月二十二日鑑水王先生以疾終于家距其生正統壬戌三月六日享年五十有二諸孤既以歲丙辰十月奉葬于膺符鄉半山之原後二十一年為正德乙亥十一月十八日配安人李氏卒距生正統癸亥九月三十日享年七十有三卜以丁丑歲十月啓先生之窆合窆焉其仲子漢為太醫院吏目自京師奔喪南旋瀕發跣泣請銘嗚呼瓚何忍銘先生墓耶而亦何敢不銘先生諱鈇字九嚴號鑑水其先由閩赤岸徙永嘉英橋為碩宗祖秉圭自足翁父廷芳嘗出粟賑饑詔立石旌之母陳氏先生生而慧敏篤嗜問學凡經史百家悉涉獵其大義發而為詩若文多沖澹融暢成一家言平居冠服整飭言笑不妄事無細巨必揆諸義協於禮而後行孝友敦於家信義浹於鄉鄉之人無少長咸愛慕尊敬憑藉先業而漸充拓之課僮奴力耕用益饒裕謹奉先之禮隆款賓之儀家政雍肅賢譽彰聞或勸求聞達輒謝焉曰吾容與詞林有以自適足矣況為宗子祀事在躬而可以遠出乎中年喜讀易手之不置性惡淫祀大創先祠祠中惟以義畫立籤有事占焉於其所居有表異堂藏書閣游藝館鑑水樓而別號則搢紳緣是樓而稱之者也性好施予周窮恆匱如恐弗

及嘗以賑陝邊授七品散官階宣義郎又以出粟拯荒郡邑奏旌其門所
著有鑑水稿五畝園集若干卷藏于家安人季氏為北門右族賢淵莊重
動循禮法相家政井井有條恩愛均於嫡庶矩範孚於姻族誠為賢宗婦
也子男三長淙次即漢次淙淙皆季氏出漢則側室周氏出也女二長
適泉川項俊次適蒲洲方豪孫男八曰槐曰槲為縣庠生曰梧曰棣曰穆
曰休曰桐曰果孫女幼未字瓚未第時寔以姻黨過蒙禮顧及瓚丙辰及
第為史官而先生不及睹矣悲夫感昔悼今涕泗潛然念無以酬厚情者
則論譔徽美以垂不朽固瓚之職而去鄉久遠咨記弗詳姑錄其梗槩如
右然瓚嘗謂先生以道自重如陸龜蒙不慕榮利如陶淵明篤行有聞信
于鄰國如司馬政德氣粹然洞徹中外如邵堯夫衆亦以為確論而安人
又以齊德翊之此所以大張家華而沒世之稱既久如一日也銘曰
有蔚王宗肇自閩徙猗歟先生益弘前美其學彌洽其行彌修貫古徹今
發藻優優于家于鄉允孚允式山川出雲雨為甘澤仁聲義聞職茲四馳
出塵高標不以俗縉所鑑惟水以觀道體川上之歎默契與旨人爰習稱
匪姓匪名匝邇逮遐駘躡驥駟旌義有門錫榮有 詔雖處林壑曷韜輝

耀壽不稱德輿情盡傷維配獲賢曰亡弗亡婉婉安人率矩秉禮曄曄大宗翊贊世紀半山之陽有安幽堂先歸孔寧後歸載康繹繹累累儲祥來祉子姓如雲于食無已

正德十二年丁丑春二月

賜進士及第朝議大夫兩京國子監祭酒 經筵講官前翰林院侍讀同脩

國史兼脩 會典同里姻人王瓚撰

封中憲大夫通政使司右通政溪橋王公墓誌銘

溫州永嘉英橋之王氏有老而號溪橋翁者生為鄉人所榮而交慕之沒相與哀之而祭之於其社翁嘗以兩子武庫君司成君貴褒為封君人不稱其爵命而稱其居蓋以德掩其貴也溪橋未為翁所治潦水鍾之浸為廣斥過者不睨翁獨售焉斬藿茨決垢汙作室於其間時猶貧也而繩板之所樹引尋尺之所圖度深廣而高衍或疑其壤之不吉以為翁憂又有笑其側者曰胡所取財而室巨如是其為築於道傍爾矣翁聞不顧治之不倦今之藿茨變為翬革之華垢汙變為堊碱之美而位置觚隅滿其繩板之所至尋尺之所揆無少缺失器幣服物童指玩植以充備其中亦稱

向之憂且笑者或已不及見而使他人追訾其愚其及見者皆自悔責其
識事之近量人之淺而益以翁為不可及也始喪其父封早孤而家又貧
也奉母周氏兼畜諸弟經營毛密母常足甘旨而諸弟衣食甚均其意氣
暇裕無纖細苦急之態遇有當費曾不吝情力亦副之於人無所忤而當
有勢者在前亦漠然無所愧詘也其後貴富矣足以放其欲以夸世駕俗
見謂得意顧獨悃悃自好不侈張具取娛快故輕糜饋用其遇物尤醇
與敵以下為釣情慤而貌恂非繆為恭愿買兒童口吻收不驕之聲而內
存矜喜有不能制時肆發而竊露者也其和氣內溢老而彌盛目光燿燿
深夜廣坐炯然與炬相射鬚眉龐皓顏如渥丹觀者皆驚為神綽意曠度
濟以溫色疊疊談辯間出於嘲諢絲竹雜作嘈啁喧耳聽受有節賞工摘
誤與少年好事均其精溪橋之居既大翁以德齒為人所尊事媚愛往者
輻輳門無停容舉盡宴游之洽微時所識有所不給咸以翁為歸施餼賑
卹不自為量歌舞其德所在有之故其歷年滋多備生人之歡嘉而不得
者不以為怨翁既貴猶念其所自曰微先人積德以遺我胡以及此始祖
惠高祖珎葬久矣墓第不治惻然追新之治其曾祖毓祖珙之墓尤嚴而

割田以入大宗之祠必選其腴美諸費甚鉅曾不以一銖髮斂其族人蓋其行誼篤厚如此嘉靖丙申七月二十二日卒生景泰庚午閏八十七年矣卒之日弔者數千人哭無不盡哀者其仲子國子祭酒激以聞于

上為 賜祭葬寵之以閔其孝公名鉅字九思 封通政使司右通政卒之年十二月伯子澈與弟激沛卜吉于先城半山之原而與恭人張氏合葬焉恭人故相張文忠公孚敬之兄德壽配翁有孫五人叔懋鴻臚寺署丞叔程國子生叔果兵部職方司郎中叔杲進士叔本恩生可以知為善者之所享也葬之日鄉人相率祖奠于途引柩而泣者數百人紼長數十尋不勝執已葬則相與斂錢為祠繪像祀焉蜡享賽饋必俎豆之期於久而不廢蓋英橋鄰壤凡五都瀕海而居其上積鹵其業宜鹽故置場名永嘉以權之其民籍皆係於竈歲賦鹽入廩轉餉塞上徵以其力之所出而不責非其有而近歲有司重以折色之徵椎膚剥髓不能充也公謂竈地半坼於海民輸其有已不贍而重以折色是責米於盤缶鑊釜之間非其出也為書具言竈民所以窮迫不堪重賦之狀甚明切以上于朝天子覽而憫之下其書浙東均折色於通縣之不為竈籍者五都之竈民得

以不徙死故其葬五都之民送之尤悲挽柩行者累踵駢肩恐不得負紼
為恨又無以自慰而圖祀之於社以記不忘嗟夫士有當勢得位力足以
施於民而卒無一善狀其生為人所詬嫉至於死猶追數其過以咎之何
限其不足懷於人泯然以死而人不知者又不知幾何入翁無尺寸之柄
而歿有以得民如此不獨其行誼之厚其材亦有以踰人者是可銘也翁
之伯子武庫君不遠千里寓書於予曰先人之葬圖所以告諸幽者非得
能言而可信於後之君子不敢以託故葬既久而未有所託今敬以託子
矣武庫君之賢而多與海內之名公雅故所以重其親之終事而其請銘
之言如此予其可辭銘曰

深坎而周封以為之宮其藏之密其樹之崇千百歲之後過者必恭相柏
與松

嘉靖二十六年丁未夏五月望

賜進士出身大中大夫河南布政使司右叅政前吏部郎中晉江王慎中撰
封太恭人張氏墓誌銘

予嘗容永嘉有稱王太恭人之賢者予訊之曰恭人封通政溪橋王公之

配福建左叅議國子祭酒二王君母少師張文忠公之女兒也兩族聲望
甲東甌郡恭人寔兼有之迺愈自降約若布素家女夙夜惟勤以身先閭
內故閭內事無不斬斬事姑周夫人孝訓諸子以德業顯自期功媿戚下
逮僕御之賤丐販之徒罔不周其惠賑貧卹哀無餘力族子之妻葉氏者
嫠而苦節所親欲嫁之恭人曰傷哉人之志善而弗克遂也乃召其所親
明大義而託之時撫而振勵之後竟以全節顯其成人美類如此蓋其治
家以嚴以勤以儉約而慈祥憫怛之意則又周洽于人人也可不謂賢乎
予聞而嘆曰嗚呼吾迺今而知天道福極之徵其所由來者遠矣粵自溪
橋翁艱難創始亦惡敢厚望於造物者曰我後必如此如此茲不十數載
而二子並列朝省諸孫方濟濟繼出以科第文學世其業予竊疑王氏之
盛其先必有碩人長者大積而深藏厚施而薄享以開其先而世所不及
知者今觀於客之言則其萃和孕秀而造端於閨闈者其力居多矣夫孟
軻叔向之賢有所由始而大姜后妃實肇王迹故曰婦者家之所由盛衰
也然則恭人之德之懿殆天所以啓王氏之祚也與然予方少也聞道文
忠公事者曰公以姊得生謂公之始生父母以日薄懼罔克見少子成立

欲弗舉恭人內不忍乃緣物為讖家語曰養則當大起吾族父母悅而收之已而母謝夫人卒公且幼恭人泣曰天道屬人道析茲非吾弟乎吾弟吾弟之也由是撫愛備至令二子與同學業卒以成器入相

今天子張族果大顯予竊嘆夫人世貴生男子不貴生女謂子賢或亢吾宗女即賢無補今張氏之興自文忠公文忠公之生由恭人則恭人寔亢張氏之宗矣恭人生而二氏之宗俱益大其所利賴於家國者夫豈微哉恭人以景泰癸酉九月十五日生於永嘉之滄湖里長適溪橋公溪橋公諱鉦有碩德與恭人宜于嘉靖乙未六月十有六日先公一歲卒享年八十有五蓋並壽云其將卒也二子一弟咸遠自遠至聚首凡數月乃卒人以為令德考終之報云父諱昇大父諱敏曾大父諱轉寶俱 贈少師兼太子太師吏部尚書華蓋殿大學士妣高氏繼陳氏謝氏祖妣徐氏曾祖妣王氏俱 贈一品夫人子男三長澈福建布政司左叅議次激國子監祭酒次沛 贈太僕寺丞女一適張鈞孫男五叔懋鴻臚寺署丞叔程國子生叔果兵部職方司郎中叔杲進士叔本恩生曾孫男十一光裕光祖光蘊光薦光祿光普光蕙光美光蔭光著光芾卒之年十一月叅議君偕其

二弟奉柩於祖隴之半山窆焉

上以仲子激經筵官遣有司 諭祭 賜敕葬蓋特典也士大夫榮之時墓

未有銘至是職方君以尊公之命來請予雅慕二大夫名德且為母黨媿
媿弗敢以不文辭序而為之銘銘曰

倬彼南畝弗耕胡穫相我君子以樹厥德黍稷既盈孰穫匪耕濟濟孫子
食舊德貞高原膺膺爰宅所止貞松可摧令德莫毀

嘉靖三十五年丙辰秋日

賜進士第資政大夫南京刑部尚書台郡趙大佑撰

友梅王公墓誌銘

里有義士曰王公諱蠲字九齊號友梅正德己卯十月五日以疾終于家

其孤漢為鴻臚序班聞計解官奔喪陳郎中憲為撰事狀葉編修成規侯

進士希允持以屬銘嗚呼公奚俟鄉曲之稱哉余辱姻愛久矣而表述垂

永孰有宜於余者公先世由閩赤岸徙永嘉之英橋曾祖允成祖秉圭父

廷方並有隱德長兄九恒次兄九嚴俱授散官公少敏慧涉畧書史學為

歌詩多警語尤敦孝友不妄言笑儉勤理家而業日饒裕鄉族之間或言

動非禮面折不徇其匱乏者則發委積周之所居之左創小宗祠扁曰追
遠歲時供祀惟謹割田以為常需性嗜梅有隙輒植之花時相對竟夕賓
至拉與呼酌其下天台謝文肅公嘗為友梅記烏牛象浦有溪往來病涉
公捐貲橋其上人遂稱便弘治戊午里大饑明年又饑死徙無算公白鄧
守願出粟倡眾賑之存活甚眾永嘉場鹺入郡城餘數十里茅竹嶺界其
中途值烈日暴雨行者靡止公斲石樹亭于嶺之中鄧守以便止名之而
余嘗記其事里之好義者莫先焉 朝廷錫冠服榮其身人以為宜故公
之卒無問識與不識同傷悼也 公生景泰辛未四月十九日享年六十有
九配張氏彭澤教諭鐸孫女貞順慈淑相家于成子男三長即漢以楷書
授直閣序班娶姜少卿廷憲姪女次浦娶李貞外升之女早世漢承父命
以子有立後之次浥側室陳氏出娶林氏女二長適潘匡次適邵諍孫男
三有慶聘周中書巽之女有立有德孫女四長字指揮劉尚文長子涇次
字序班金雲鴻長子承誥餘幼公嘗營壽藏半山祖壠之原茲卜以正德
辛巳正月八日奉窆焉從公命也公修德于躬殖其家敷惠于鄉之人而
又有賢子以振其後是以垂不朽矣銘曰

吾嘗觀于里中而悉公潛德之美維德之美賢聲聿起既被 國恩載逮

其子半山之原風氣攸凝於焉永歸彌固彌寧太史勒銘以福爾之雲仍

正德十五年庚辰春三月

賜進士及第通議大夫禮部左侍郎前兩京國子祭酒 經筵講官翰林院

侍講同修 國史同里姻人王瓚撰

承德郎南京太僕寺寺丞海西王公墓誌銘

予與王子希說學同志且聯姻嘗侍其尊君海西公以子弟行誨之無何
王子仕為廣東廉州府推官沒後若干年而予始官郎署頃過家王子之
嗣玄肇以海西公墓誌銘請蓋為予夙知公也予胡敢以不文辭按扶公
諱清字子介海西其別號也曾祖諱環祖諱坦父中制公諱鏞以孝義長
于鄉母陳安人公少端謹不妄言笑弱冠補郡庠每試必取高等同游姻
戚昆弟如僉憲月川李公宗伯甌濱王公予從父少師文忠公及宗之少
叅東厓公司成鶴山公一時聲望相頡乃七試不第應貢入太學正德辛
巳授直隸泰州判官以廉能著聲嘉靖丁亥擢真定府通判真定地廣而
衝疲多匿盜公勤恤民隱芟剔奸宄不為勢沮有屬邑丞以倉糧受誣御

史郭公希禹欲置之法公力狀其寃幾至抵忤已而御史悟顧賢公疏薦于朝謂公百行服人一廉絕俗賑饑普霑實惠署邑茂著賢聲當路廉之擢南京太僕寺寺丞至則綜理牧政井井有條堂卿何公亟加推重時文忠公方拜相鶴山公官吏部衆謂公稍延可躋華顯乃以慈侍老年遂乞休致詔允厥請檄有司復其家公歸奉母躬甘旨屏迹鄉居諸當道咸敬禮代巡王公繼禮造其廬樹坊表之郡邑守令屢以鄉大賓敦請辭不赴其恂朴謙讓類如此公性孝友取予必慎視聲焰不為動平居坐立不側氣息凝深望之知為德厚所至奉職取重措紳迨優游林下率真履素則若無位者此豈矯飾為哉生成化丙戌正月十八日卒嘉靖甲辰十一月二十七日壽七十九卒之又明年丙午九月二十八日附厝膺符鄉半山祖壠與配邵安人合葬焉子男四長良弼即希說次良相良勅早卒俱邵安人出良會副室李氏出女二長適山北林裔次適瓊溪邵伯楷孫男三玄肇國子生玄覽玄巽孫女三方舉庠生何珂東舉庠生姜偉榦楓林庠生徐守愚其壻也公卒若干年而墓碣未銘若有待者予忝辱世講既次其行蹟乃為之銘曰

其貌古而心亦然其言確而動罔愆廉善表於歷仕恬曠見於引年既茂
膺乎祉壽亦光裕乎後先我銘在碣百世徵賢

嘉靖三十七年戊午秋七月既望

奉議大夫南京刑部陝西清吏司郎中通家子張純頓首撰

¹⁶福建布政使司左叅議贈朝議大夫東厓王公墓誌銘

余與永嘉鶴山王公同舉進士一見大竒之輒引為道義交孳孳推轂如
恐不及談者以為罕比公卒乃不得銘墓而表其遺文沒齒有餘憾焉茲
伯氏東厓公卒其子武選君遠來乞銘余蓋戚然興思曰公之兄即吾兄
也銘其兄即所以銘公矣按狀公諱澈字子明別號東厓世居邑之華蓋
鄉英橋里王之先舊傳五代唐時自閩來徙近傳自台之黃巖宋乾道間
以海患蕩析莫遯其宗今稱始祖萬十一府君惠自所知也惠生仕宜仕
宜生珎珎生毓是為樵雲府君公高祖也大王氏者自樵雲府君始曾祖
珙祖封父鉦號溪橋溪橋翁有隱德鄉人戴之祀于社以仲子祭酒公激
貴封通政使司右通政母張氏封太恭人少師張文忠公女兄也公
蚤歲穎異好學與舅氏少師公及仲氏祭酒公自相師友游庠序赫然有

聲每試輒首多士一時稱士望者必曰二王云正德癸酉舉于鄉嘉靖丙戌仕為禮部司務歷陞兵部車駕司員外郎武庫司郎中隨其所司而奉法懋績公卿僚友多加愛敬時少師公為首相祭酒公又官銓曹衆方豔屬公退然自抑一以忠信周旋扶植善類不遺餘力卒未嘗宣諸口齒而措紳先生至今稱之不衰嘉靖甲午會配潘宜人卒于京遂乞告以歸時溪橋翁暨張恭人俱壽大耋公承懽左右方走疏終養而福建叅議之

命且至竟不赴未幾連遭大艱服闋遂再疏乞休致時乃閉門却掃日惟以推贏賑乏敦禮舉義為事建始祖祠費千金不以絲粟煩其宗人著族約立約正司訟司糾旌察淑慝有陵噬忿爭者則遵約聽之不使煩于有司割田供時祀每歲立春祭畢大會族衆歡以酒食申以訓辭衣冠來集幾千人肅肅雍雍如也若孤嫠老疾死喪無告則出餘帑周之丁田積夥賦役易淆則類族丁產為冊籍稽之家有羨貲而黜靡戒奢自奉如在約顧用以義則厚捐弗靳其亢宗貽後類如此家居恥事請謁至鄉土有急難及利弊所宜興革者又汲汲引為己責所居濱海舊籍沙城衛鹵地歲久蕩蝕且盡公承溪橋翁志籲衆築石堤竈氓樂業而鹽課賴之嘉靖乙巳

歲大饑米價驟翔道殍相望公指廩減價平糶復廣設糜粥以待餓者日
就食者踰千人兩月始罷所全活無算已公器宇凝重性度坦夷謙謙下
人隨貴賤小大遇之如一率不由於矯不妄喜不留怒不念舊怨惟德則
必酬是非好醜皦然於中顧多務含蓄而發於義者固侃侃也予識公郎
署中而信其德厚如此蓋不待狀而知也夫士君子進則澤被天下退則
仁施一鄉其志之所期與業之所就得於此而不得於彼者恒多也公徇
翔郎署十餘年所治固不越常職方少師公持大議時諸建置進退震聳
中外公從容調護少師公多信從而忠賢藉其陰庇于今猶昭昭人耳目
林居二十年身急鄉族如行宗約餉饑民賑貧郵匱諸行事雖在公為庸
行而鄉之人受賜被德則不可數計矣視夫進而徒張聲勢退而自足娛
樂者其為人何如哉槩公之平生孝友刑于家溫恭豈弟孚於族賢聲義
聞洽於遠邇卒之日自搢紳及閭巷莫不咨嗟痛盡欲起公而不可得吁
此可以定蓋棺之論也公生于成化癸巳九月三十日卒於嘉靖辛亥九
月十三日享年七十有九子男二長叔果嘉靖庚戌進士今兵部職方司
郎中前以職方主事滿考 贈公為朝議大夫次叔果壬戌進士今兵部

車駕司主事女一適南康縣丞嚴孔昭孫男四光蘊舉人光薦光普光美俱國子生卒之又明年正月八日果等卜葬宋舉之原族子僉憲君德狀公行實事甚核而文甚雅馴余因而為之銘銘曰
曷厚其生總茲百祿曷篤其慶華茲似續 皇國之楨鄉邦是淑昭哉令德俾也戩穀膺膺佳城吉其得卜有鬱者松有苞者竹碩人收藏如金如石宋舉之原過者必式

嘉靖三十三年甲寅秋八月既望

賜進士出身資政大夫南京兵部尚書叅贊機務明州張時徹撰

¹⁷封宜人贈太恭人潘氏墓誌銘

潘宜人者故福建布政司左叅議王公配也宜人蓋永嘉龍灣里人潘公鬱女母張氏嘗有子女俱蚤世竟無嗣而獨宜宜人宜人性貞靜幼受句讀解文義年二十二歸叅議公家食時與其弟祭酒寺丞公同居爨以養二親悉家事付宜人宜人勤儉孝敬間內事無巨細咸身任之乃事事當姑張恭人意恭人素嚴重顧獨賢宜人每曰冢婦固宜爾是善事我於是王氏無不稱宜人賢者又與二三娣姒協和宜其家以臻于理以

故叅議公無內顧憂得專力于學始叅議公屢舉未第且艱于嗣宜人則
勸慰之曰無後重事置媵圖之宜無不可得士人出處固有時待之耳後
叅議公舉于鄉如宜人言遂又得兩男子然皆宜人出也叅議公初仕為
禮部司務使迎宜人宜人以親老子幼謝弗往數年叅議公奉使歸欲攜
二子就學京邸始與偕往公歷官庫部正郎宜人拜

恩誥得今封喜曰二親在堂二兒可室吾歸宜也方戒行而疾作遂卒乃叅
議公請于朝以櫬歸竟侍養不出雖恬退之節由於雅尚夫亦以良助
既失內無所倚故耶初宜人舉二子也晚愛甚矣顧教之嚴童時不俾與
羣兒伍近燕褻事及就外傅一任督策不代求寬假有過弗為隱侍膳大
父母必別以糲餐曰是不可使慣甘美他日能堪粗惡耶嘗年饑里人多
麥飯亦令二子麥飯曰庶知農家常味既勝冠未嘗與衣帛曰若曹布衣
時欲須美服耶力學自得之又時時舉叅議公祭酒公微時事以勗之曰
此若父叔所以有今日也其謹識之勿忘嗟乎母之於子也愛而知教者
固已鮮矣觀宜人所以教其子者不獨望其子以章句青紫已也乃跬步
不欲其踰於禮雖古內則及詩書所載何以尚焉可謂賢明女士者矣宜

人生成化丁酉正月十二日卒嘉靖甲午五月十四日得年五十有八明年祔窆于半山祖塋癸丑年正月八日始遷宜人與叅議公合窆于宋輿之原男子二人長叔果庚戌進士今兵部職方司郎中次叔杲壬戌進士今兵部武選司郎中女子一人適靈山丞嚴孔昭先宜人卒孫男四人光蘊光薦光普光美曾孫男八人至言至充餘幼未名宜人卒後二十三年叔果以兵部職方司主事滿考加贈太恭人是年職方君奉狀詣余曰果兄弟不似寔惟母宜人淑德懿行無不可紀述銘碣尚虛惟吾子之言以不朽余既欽職方君伯仲令德夙茂誦母狀知其賢所自遂敘而銘之銘曰

古重內治興廢是基家有嚴君是曰母儀猗與宜人禮則無違相夫若賓訓子若師逮下弗忌神與岐嶷身膺翟第既貴以祺既貴以祺胡不永綏軒出櫬歸亦孔之悲我銘幽石式播音徽千萬斯年以福爾嗣人于斯

嘉靖三十九年庚申仲春望日

賜進士及第資善大夫禮部尚書兼翰林院學士淮海李春芳撰

中憲大夫國子監祭酒鶴山王公墓誌銘

鶴山王先生舉嘉靖癸未進士之明年出知吉水吉水劇邑也精于吏者
咸病其冗乃先生臨之殊不經意日出公庭數刻發遣文移了爭訟幾事
已復操筆為文辭亦數刻立就忘其身之在公庭也暇日與諸生讎校經
義或對客談古今詩律得失何在雜以譁笑聽者忘疲其說經義不甚規
規求合時調即在公庭亦不喜為時調束縛而其譁笑嘗以取容上官與
諸敗官行事為譬若將諭己意者訟至多引古人忍讓事俾自悔改更不
禁繫以賦役留者言語歐歐如其家人父子節縮簡澹惟所欲便不令人
迫苦人亦踴躍趨事嘗恐後期邑中人人稱其易與久之跡境內凶人王
璇五六輩發其奸寘之憲典於是人人又且畏顧奉法以為操縱在先生
固不一以自竒如是者三年一日也已而 內召私語洪先曰吾舅柄用
外間方且籍籍吾可以身為口實乎洪先力贊其決蓋先生為張文忠公
孚敬之甥年且相亞又交好也丁亥擢吏部文選司主事戊子出典廣東
鄉試庚寅擢考功郎中滿考擢南京通政司通政癸巳 召主膳黃未幾
改國子祭酒兼 經筵講官為吏部進退黜陟人才務當情實尤能採拔
幽滯直己無所他徇在國子歲餘振勵有方士多所興起然其私心既不

欲以身為人口實常有意引退屬二親垂耄無歸養蓋屢疏始得請既連
遭內外艱心不勝痛竟以疾終其歸之年纔六十也先生長身玉立風致
魁岸負氣不肯下人不獨自視甚高望之者如塵外孤鶴不易籠絀久而
窺其胸次率自貶讓自其少時抱異質書過目輒成誦兼通諸經弱冠以
春秋魁兩浙而舉進士則以毛詩居常有意辟穀酷嗜仙釋氏語稍長才
名迸出傾壓行輩太宰喬白巖山人孫太初引為文字交而於許台仲金
汝白應邦升咸稱莫逆間因徐曰仁朱守中問學於陽明王公徐金五君
皆浙之諸君子也先生平生磊磊若此然僅自効于下邑方躋顯位未獲
盡其所長溘然遽至淪沒豈不惜哉議者以先生之才即無親援固當得
顯位即有親援得顯位忌者必不敢相讒即相讒未有能中者顧自惜其
身而先幾引遯是可多見耶先生名激字子揚世居永嘉之華蓋鄉至先
生始徙郡中康樂坊曾祖珙祖封父鉦以先生貴封通政司右通政母張
氏文忠公之姊與其配邵皆封恭人先生生成化丙申十月七日卒嘉靖
丁酉八月十六日先四年而邵卒己亥十月合葬于十九都交陽之原子
二叔懋鴻臚寺署丞叔程國子生女一適都指揮張大本孫男三光裕郡

庠生光祖光祿邑庠生洪先為諸生時先生試其經義賞識之又知其所志不苟故每語以心事比登第纔一再見而先生別矣先生既葬墓未有銘叔懋以書來曰子固知先子者不可辭銘又六年始納銘于墓銘曰于嗟鶴兮胡為乎來匪稻梁之謀而衆鳥羣猜其才高而貽災兮于嗟鶴兮胡為乎去將寥廓之遊而遺世弗懼其數竒而寡遇兮

嘉靖三十六年丁巳春二月既望

賜進士及第右春坊右中允兼翰林院修撰門人吉水羅洪先撰

贈太僕寺寺丞仁山王公墓誌銘

嘉靖中倭寇起東南虜掠海濱諸郡邑人無虛歲所在望風奔靡有司苟且飾功過無實為民屏捍民亦莫知所為生無久長計嗟乎厄苦矣余嘗希冀必賢有司者出斯能為民樹保障修戰守備不然民間豪傑亦宜有激義奮厲守境土者乃始見烈士王公云按烈士諱沛字子大號仁山居士永嘉英橋里人父曰鉦號溪橋翁封通政使司右通政母張氏封太恭人通政公有隱德生三子長參議公澈仲祭酒公激季即烈士公公精曉古禁方以醫施於鄉因例授益府良醫狀貌歸竒個儻有大畧抗

厲希古人風敦行孝友徜徉泉石視二兄融顯澹如也又好義務趨人之
急里閭事身先為之亡憚費財力人人稱王仁山王仁山云始壬子倭寇
掠黃巖偵導薄樂清縣永嘉人卒莫為備烈士公羣鄉人諭之曰群盜竊
海隅為姦利非有戰勝殊算乘不備為亂耳吾鄉人千餘家亦夥矣簡健
士明訓約慎固厄塞鄉自為守足為雄鎮抑令賊知犄角絕窺伺吾郡豈
直一隅丘墓計耶眾唯唯如戒命又與族子僉憲君德協議為民望日夜
謀所以備寇者五都人數歲恃以毋恐丙辰十月寇入南溪抵龍灣人咸
震懼公與僉事君率精兵禦之至上金下令曰賊散出搶掠無鬪志我師
整一鼓擒之耳眾踴躍向敵敵遂潰遁追殺數十里馘數十人獲馬十餘
疋賊噬指相戒不犯五都界兵憲袁公以倡義顏公門時烈士公年已七
十有二矣其奮義勇為如此戊午四月寇復大至羣艘蔽海上燒虜至盤
城及梅嶺人人謂弗能支宜且入郡城避其銳公哂然曰吾始倡議萃眾
為境土計鄉人以我故幸樂從英英凜凜有成績矣退尺失丈焉得為一
身謀忍見鄉人流離成丘墟耳仍偕僉憲君往禦抵梅嶺寇佯為退伺僉
憲兵分登山公駐兵山半勢單弱賊從海上出一艚奄至衝圍公公猶持

戈擊殺數人遂遇害兵衆衛公不忍舍亦被殺數十人鄉人聞公死哀震里巷遠近人士無不義公痛公者公卒後再旬僉事君亦戰歿誓不負公也自是賊勢日熾不可禦至圍攻郡城焚虜村落無深遠不至無復顧忌矣事 聞得 贈太僕寺寺丞立祠令有司歲致祭廕子一人入國子學先是把總夏君同知黃君死於寇衆皆悼惜公獨曰人等死耳死王事徒死乎乃天性英毅所素嚮往然矣烈士哉烈士哉公壯時嘗寓括蒼旅舍得富商雲三遺金百兩富商死逾年其子來謁舉還之無少負叅議公創宗祠行族約衆推公年德優異為一族長凡歲時謁真率以身先之寒暑不怠鄉間有鬪訟事赴公剖析無不悅服去有古王烈風其保釐一方捍患死事又炳炳最著者生成化乙巳六月十八日卒嘉靖戊午四月六日配安人朱氏先公卒男子一人叔本郡庠生今廕入國子學女子二人長適邑庠生林一桂次適瑞安姜天偶孫男子四人光蕙光蔭光著光芾孫女子二人叔本卜於次年十二月二十四日將窆公于茅竹山之原與朱安人合于是叔本手職方君狀請誌其藏余既論著其大都系之銘銘曰矯矯橋翁濬源發祥維伯維仲和鳴鏘鏘騫于天衢亦耀有光乃及季氏

垂老且強以死勤事捍患衛氓

皇帝曰嗟惟烈士良詔爾京秩寵爾幽壤育孤于國肇祀于鄉維不徒死既蹈其常後千萬年式此貞藏

嘉靖己未夏五月既望

賜進士出身中憲大夫江西按察司副使奉 勅提督學校栝蒼何鏜撰

鴻臚寺序班居竹王公墓誌銘

嗚呼王公今已矣公為直閣太常卿周公令之壻予同年祭酒公激之從姪也始余於太常第數會公見其雅飭端重心竊欽之既而聞公登用喜禁秘得人已乃聞公不祿嗚呼惜哉公諱有慶字孝卿別號居竹世為溫

州永嘉人曾祖諱埏祖諱錫世傳奕葉至千餘人時稱巨族必曰永嘉王氏父諱漢號雙溪工楷篆任鴻臚序班供 內閣誥制房事母姜氏太僕

少卿東溪公立綱姪女也公少負敏質器宇不凡偕弟邑庠生有立進士德習舉子業垂成棄去遂留神大小搦篆各極精妙嘉靖丁酉應禮部選直 武英殿所典皆 朝廷秘密公莅以勤恪用是受知臺閣三載滿考賜 勅命進階登仕佐郎公天性孝友處姻族雍睦儀度動循矩則溫恭

周慎于物無忤要其中蓋綽然裕如者積勞將及九載晉秩有期衆咸以華顯望之乃今遽至此嗚呼命哉公生於弘治乙丑四月二十六日卒於嘉靖丁未四月八日得年四十有三配周氏子二長玄祐禮部儒士娶項氏同邑項憲副喬從弟栗之女也次玄祐女一孫女一俱幼玄祐自京扶櫬南歸將卜以明年 月十二日葬于半山之原先期持順天茂才王君璋狀因太常公謁予請銘念夙誼弗可辭也乃誌而銘之銘曰
昆吾之切方武運打渥水之驥方騁遽蹶位不副乎其才生不滿乎其德嗟哉何其數之阨也然而 秘殿職修濬美振業自將垂不朽之名而衍無窮之澤

嘉靖二十六年丁未五月

賜進士出身通議大夫通政使司通政使直

文淵閣

經筵預修

國史 玉牒嘉禾張文憲撰

廣東按察司僉事贈中憲大夫太僕寺少卿東華王公墓誌銘

天其有意斯世乎必生任事之人維持而率作之生平所期率汲汲於吾身是非利害之外幸而學焉斯聖賢其歸也不然意氣激發尤當雄偉豪

傑振越一世而天下治亂恒必賴之吾嘗持以定士品而莫有信其然者
吁可異也往年嘗晤東華王子素御醫所當是時王子為進士年纔弱冠
色潔白若冰雪竟日不一接語後十四年王子棄廣東兵備僉事東歸過
予慨然以身相許為語在戶科時募兵山東曲折與兵備嶺南諸事甚悉
其後數以書問又三年為丙辰倭擾海上漸及溫官府熟視不知計王子
主族議練鄉兵待之其年十月倭渡南溪入蒲州殲之於上金斬首十有
六擒十四人拔其脅虜八十人還之鄉明年復殲於梅頭斬七首自是倭
畏永嘉場不敢犯永嘉場王子之所居也戊午四月六日倭至梅嶺王子
伯父散官沛死之王子憤曰所不能戮力復沛讎者有如此海次日斬二
首擒七人而他酋數千方圍樂清十四日王子納其家郡城十九日兵備
素君祖庚來告急遂移素寧村以便策應是日叅將張鈇來附是時倭圍
郡甚急素請援以張並進王子許之凌晨簡輕銳從間道往日吳伏起金
舉遂遇害當變作時猶手射殺數人張兵相視甚邇無一抃者倭以鄉兵
少之不知為王子也總督胡公宗憲上死事于

朝 詔贈太僕寺少卿立祠郡城廕子世襲百戶已而當道聞狀為之黜素

罪張以伸王子則何及矣嗚呼當王子奉命募兵及為兵憲以兵死死職也今死溫何哉夫金不殫雀尸不代庖此易知也出門反顧誰則無情且儒者之論多主委任權力而敵愾弭亂率諉武人即任職者猶且以此藉口况肯營其所不及乎士大夫居鄉養驕惰臨事則高拱緩頰譙責不至議者方以持重歸之王子計不出此而所汲汲乃在於吾身是非利害之外嗚呼王子其有大不容已者乎或言王子有母在郡郡圍則母危王子殆死母也或曰然矣使無母其遂已諸王子其有大不容已者乎吾不悲王子任事之心不見知而悲天之生王子者不待深究而止是焉其故何也王子既殯之明年其子如珪自為狀走使不遠數千里索予銘且曰先君靡日不言先生幸卒憐之予持書泣曰予後死矣忍不為銘按狀王子名德字汝修少英異有大志舉丁酉鄉試戊戌第進士庚子授東昌推官善治獄巡撫曾公銑壯其人每見必改容嘗署高唐苦于汲開北門便之鑿土得石石有曰北門開王德來人語為神辛丑臨清外城成以督工陞俸一級六月丁父憂丁未補大名會河南盜掠湖廣貢金衆疑在滑且指四人姓名為証枝連數十家有詔逮捕王子聞之自府趨滑驗狀

無實執弗與河南將上 奏未幾得真盜京師遂釋滑人滑立生祠祀焉
自登第至是十年不遷不知榮進比滿考會選臺諫乃與沈君東堅不赴
考為當道所廉授戶科給事中二旬上疏請簡輔臣

上不加罪旋主光祿罷無名費才三月省四萬餘金庚戌北虜入寇條陳十
餘事首議開北門納奔民平通太二倉米價活諸餓者夜半遣中官至家
傳 旨允之無何募兵山東軍資寡懼不足數則假便宜簡民兵直以償
之易其名曰義勇兵始大集是時 詔下特舉才望格於議出為廣東按
察司僉事兵備嶺南至則以身率兵鷓勒村堡動至數百十人飲食兵器
呼吸立具蠻寨惴惴莫測次第就降會英德民壯盜庫金為海兵所獲知
縣吳希曾畏罪反坐海兵爭之不得遂引疾棄官不悅者初其擅違竟罷
職異時王子所語募兵與兵備即此兩事此兩事在王子猶不甚奇其居
官廉慎過於處子執古喪禮不眩時俗在諫垣歲餘凡四十疏詞極剛懇
忤人而其人喜怒又足以張禍福曾不委曲少徇其意生平所期惟知進
則澤被天下退則福及一鄉以必不負此心為主盖有人視以為無益而
己在所必為人或以為可緩而已不容以朝夕者嗚呼是果可以死乎王

子自五代世居英橋宋有諱惠者以長厚望于鄉高祖毓曾祖埏祖鐸父
浥號橘泉以王子貴 贈文林郎直隸大名府推官母林氏 封太孺人
娶邵氏 封孺人子二長如珪舉人次如璧鬣錦衣副千戶女四長適禮
部儒士張鳴球次適庠生項光祖三適林夢祥四適庠生侯保邦王子生
正德丁丑閏十二月十二日午時卒嘉靖戊午四月二十日申時年四十
二銘曰

孰不有親而殺其身徵之聖人聖人曰成仁孰不有己而輕其死告之

天子 天子曰勤事情之所激嘗恐罔生謂非天與其成則既見之生平事
之可為尚不止此惟其心有不已夫是謂之志士

嘉靖三十八年己未六月望吉水羅洪先撰

廣東按察司僉事贈太僕寺少卿東華王公墓表

當太僕公之將入給事中也跳弗肯應曰吾必死諫死易耳而以貽太夫
人憂何辭不許乃入給事中數上書論事執政固目攝之矣而會虜闖寇
塞內傳大都公遂欲死虜而以募兵出歸復欲以死爭權相不果而遷按
察僉事兵備嶺南以去一與其守令議大盜獄不合臺右其守令即自刎

歸永嘉歸而自憙可無死以終奉太夫人也乃又不勝激島夷難從鄉里
惡少年拒走之凡三載永嘉之鄉兵幾振無何竟敗以死太夫人固無恙
也且夫士豈必盡用死重哉夫不死遇也或曰公殆欲以愧夫封疆之
臣而失職者則又非也夫公知有君親而已矣奉君則君重奉親則親重
死不死遇也公姓王氏諱德字汝脩世為永嘉名族而其在諸生時美髻
眉妍皙若玉雪人固肅然亡敢以狎進甫踰冠成甲第授東昌府推官丁
父憂歸補大名公之兩司雄郡理以一切治辦稱又嘗城臨清論功進歲
奉而其辨滑大盜獄滑人德之為祠祀焉幾十年而始拜給事中即勸

上簡內閣輔臣謂文言而不當用強博而不獲要外廉而內濟欲陰伎而陽
為容者非其人也執政固中惡所繇目攝矣而公按光祿即汰其費三月
而得四萬金當虜入公所上十餘事如開北都門入郭外避賊者減京通
倉糧價使民得量受食而又薦材士大夫趙貞吉劉燾輩要當

上意比奏即報可所募兵山東為諸道最搢紳大夫交口推公才以當一面
而忌者亦時時反唇會新太宰上事公投刺少殺其禮太宰貴倨甚即出
公而公素嚴重諸給事偶坐不能得公一語而公間引其所善論國大計

臧否人刺刺不休也故事三司謁臺亡不謬為恭謹前白事若小吏而公其末顧獨捧手而已不為禮乃至都御史訶公廉檄餘奉為餉且獎公公曰都御史於法亡獎二司者二司法不得受餉下其金籍之公部兵執盜民也民亦謂公兵盜郡守為民請持未決而都御史意公私其部兵則猶以籍金故公之歸太宰移文留公不得而前太宰復用按牘曰是故強項給事耶以擅離職罷公公所前募山東兵精甚居自恨不得以其兵一當虜而其僉事嶺南數選練驍銳以軍法約束之身入諸徭寨所傷殺捕鹵過當歸適有倭亂乃納太夫人城而從其宗人豪散貲財募兵為墓井捍嘗一再敗之斬首獲生以數十計最後公雖擊敗賊然失其豪以是憤恚奮益前冀復豪讎而叅將缺兵悔約跳郡援又不至兵既敗公猶手射殺數人罵賊以死然賊自是奪氣竟不能越公鄉而薄郡矣夫公以烏合之眾素所夷等非有國家一節以提衡其命而能用之至三年而亡畔散功雖不終自兵興以來未之有也

天子用督臣請嘉公誼贈太僕少卿賜祠春秋祭額曰愍忠官其後一人錦衣百戶世世弗絕嗚呼公之致身不必在官主之用公不必及身雖若

俱稍後者而其交盡而互報則無憾矣公之進士字人有與時相連者以書為公請公審視之削其請而後投生平一謁雖賢亦必却其於進數避不肯就於退則一拂袖而決此其倡果勇奮節激昂豈復有赴會希邁意哉公之歿春秋僅四十二有子如珪舉鄉進士賢而文如璧今為錦衣副千戶謂不佞好談說古今節義事俾志其大都於墓道之石餘見羅贊善侯布政志傳中

萬曆二年甲戌秋八月

賜進士出身中大夫太僕寺卿吳郡王世貞撰

觀復王君墓誌銘

永嘉故文獻邦宋時多以儒鳴其在程朱之門可舉也嗣有興者吾姑未暇論若觀復王君之篤學勵行追蹤往哲似可以無愧焉族父職方君育德氏雅言君賢已而得君仲弟煦所為行狀益悼君不可已君諱勳字景銘自少靜重寡嗜弄往復塾學中目無游睇十七八遂志聖人之學獨有得于孟氏之先立其大者且謂本朝陽明王氏之推尊陸氏誠有獨契其發明致良知云者與其本心之旨合蓋皆出於孟氏俾領者反身即得

無泛求支離之病遂手輯象山語畧明其非禪而晦翁晚年不相二者如此復錄先正格言及已平日所自得者曰檢身集日取印證以期不違於造次無忤於隱微補郡庠弟子負為舉業貴意嘗屢試高等故業禮經以今業者徒沿泥傳訓乃獨研求作者精意至儀章度數眇忽翫必悉究其底止既復覽群籍尤喜玩易嘗揭復及家人二卦張子東西銘于座右曰是心身家國天下備矣而復其要也惟復然後識良知

遂自號曰

觀復子平居沈毅任重至與人畧無城府數犯不韙

雍肅肅即下臨臧獲未嘗有急之厲聲朋徒就學

讀書至深夜雖盛暑不褻服倉卒不作草書弟

為族獻君率族人習禮眾感其勤恪樂為盡鄉

十年與職方君群季朝夕切劘雖手不釋卷而

間嘗曰使吾老是山今此學有明以待諸君宦

夏忽邁疾謂家人曰吾將逝矣向八載前五

予其能久乎又曰予雖蚤世遺事當子是

以丙終已而乙丑日夜半介在丙寅

者及復開示壘壘忘倦

洪公坦撒行鄉約廉君

引觀而化焉讀書半山踰

好息以去善取樂於山水

招平生足矣而丙午

與子同壽今期至疾作

予者越數日又以予將

對家人神思若平時計

聞貴士寒峻莫不痛憤至涕洟

賢者之應如此邑士遂共撫遺行之

公二公皆為榜其間旌之或者乃槩君

諸後嗟乎是惡足以語君也古之人曰

少槩於慮已幾乎知幾而神者名何足

獨詣必能使斯道有明其所風被奚啻

此君祖涪父澆生正德乙亥十二月

以卒之又明年葬上策洋職方君請敘

悲王君乎有闕者形不闕者神靈珠

以常珎維顏有平陟降帝庭既媿

丘千祀有道之墳

嘉靖三十六年丁巳冬十一月既望

賜進士出身承直郎刑部河南清吏司主事泰和胡直撰

公之勇進士

生平十謁

不勇奮節

進士

天規

使

族人

十三日

為之銘曰

隨復以返于

算亦幾其仁君無

有與

之卓世不可

肅比君卒人咸以為

欲列祀鄉賢繼請于阮

天又莫得名賢為傳

美而君獨輕若妄說不

則其質亦詭為指

其君已者

世孕里生子維

之卓世不可